


# 順德詩徵

黃維瑁署



儒學光雙塔  
詩風集大成  
公元九三三年重建  
大成殿於雲公園  
大良羅冠樵續書  
桂海何竹平敬題



公元一九九七年歲次丁丑春月穀日

# 順德詩徵

邑人李栢敬題



桂洲何孝思堂初版

順德詩徵目錄表

作者芳名

頁次

封面設計

容奇黃維瑁題端大良羅冠樵繪圖

扉頁題端

江尾李 棧

總目錄表

順德地理位置圖

詩徵選錄與參考書本名目

聖門學詩圖

馬齊陳 興

論語中之言詩學詩略錄

龍山鄧又同

序一

水藤何叔惠

序二

容奇陳秉昌

序三

大良何沛雄

時彥題詠

陳泰階 潘小磐 李狷齋 李秀南 梁耀明 李本立 岑文 鄧瀚鈞 潘思敏

周永康 何叔惠 何幼惠 何乃文 馮影仙 潘鎬澄 蔡任平 羅妙馨

陳公望 梁荔夫 關應良 冼燮培 麥寶霖

明代天聲題端（目錄與作者編次）

葛岸岑滌群

清代言志題端（目錄與作者編次）

紫泥黃相華

近代詩林題端（目錄與作者編次）

古朗伍宜孫

輯後語與近照

桂洲何竹平

跋


桂洲何文禮

封底翰墨

龍山陳荆鴻

六四〇

順德詩澂





詩徵選錄與參考書本名目	作者自著專集除外	白雲山探勝	鶴山梁松生主編
順德縣志	清咸豐癸丑版、民國己巳版	禮山草堂緒餘	番禺何曼菴叢書之第六種
五山志林	邑人羅天尺撰	嶺海詩鈔	番禺凌揚藻評輯
羊城古鈔	邑人仇巨川輯	嶺南文學史	中山大學古文獻研究所陳永正編
粵東詩海	邑人溫汝能纂輯	現代詩選	中山古卓崙倡印
龍山詩錄	邑人溫肅輯錄	嶺南近代畫人傳略	中山鄭春霆編
嶺南詩存	邑人何翹高輯錄	嶺南畫徵略續錄	番禺汪兆鏞編
鳳山詩粹	邑人胡子流輯錄	廣東書畫徵獻錄	番禺汪宗衍編
清詩拾萃	邑人陳緯南手稿	嶺南近代四家詩	樂昌張昭芹編
藝文叢稿	邑人陳荆鴻主編	廣東歷代詩鈔	南海余少飄編
順德歷代士林書畫專集	邑人蘇啓昌主編	現代詩鈔	南海李景康倡印
歷代先賢詩選	順德詩詞學會成立創刊	錦山文社春禊藝文集	南海陳伯祺主編
鳳嶺僑聲	香港順德聯誼總會出版部藝文	晚晴簃詩匯	天津徐世昌編
順德藝文集	邑人何竹平主編	近代詩鈔	福建侯官陳衍編
學海書樓七十周年紀念文集	邑人何竹平主編	皇明詩選	江蘇松江陳子龍主編
旅美三邑總會館簡史(1850-1974)	藝文版	明詩別裁	江蘇長洲沈德潛周準合選
朱九江先生百七十生朝行誼輯述之薪傳專刊		二十世紀名家詩詞鈔	浙江毛谷風主編
松桂堂集	簡岸讀書堂再傳衆弟子輯	春秋詩社詩集	歷期出版
廣州市文物志	嶺南美術出版社出版	碩果詩社詩集	歷期出版
南社研究	廣州市中山大學出版	健社詩社詩集	第一期至第四期出版





論語中之言詩學詩略錄

龍山鄧又同書於香港學海書樓時年八十一歲

論語一書、爲儒家學說之重心、與大學、中庸、孟子、合稱四子書。昔時爲開科取士之用、因此其哲理、影響於當時與後世之一治一亂至爲重要、自可知矣。茲者、竹平主席所錄前賢詩作、於明清兩代間、不少掇巍科、學優而仕者、自當更有如宋代趙普嘗對太宗所云：「臣有論語一部、以半部佐太祖定天下、以半部佐陛下致太平。」用以化民治國者焉。我順德五百多年來、人民之務於學、勤於生事、其在斯夫！其在斯夫！然則論語二十篇中、有關論政、言志、問仁、問孝、乃至問事鬼神等等、杏壇當日、真是無所不談、言必有中、足爲世法、應無疑義。而其所載、說及與學詩有其關連者、尤值得一記焉。此先哲列詩、書、易、禮、樂、春秋爲六經。孔子曰：「六藝於治、一也。」其故在此。方今政教日盛、上下朝野乘興遣閒之中每常表之以詩、正現古爲今用之景象矣。爰摘論語中有關及詩之說、略列於左。

學而第一

子貢曰：貧而無諂、富而無驕、何如？子曰：可也、未若貧而樂、富而好禮者也。子貢曰：詩云、『如切如磋、如琢如磨、』其斯之謂歟？子曰：賜也、始可與言詩已矣、告諸往而知來者。

爲政第二

子曰：詩三百、一言以蔽之、曰、思無邪。

八佾第三

子夏問曰：『巧笑倩兮、美目盼也、素以爲絢也。』何謂也。子曰：繪事後素。曰、禮後乎？子曰：起予者商也、始可與言詩已矣。  
子曰：關雎樂而不淫、哀而不傷。

述而第七

子所雅言、詩書執禮、皆雅言也。

泰伯第八

曾子有疾、召門弟子曰；啓予足、啓予手、詩云；『戰戰兢兢、如臨深淵、如履薄冰。』而今而後、吾知免夫、小子。

子曰；興於詩、立於禮、成於樂。

子罕第九

子曰；吾自衛返魯、然後樂正、雅頌各得其所。

先進第十一

暮春者、春服既成、冠者五六人、童子六七人、浴乎沂、風乎舞雩、詠而歸、夫子喟然歎曰、吾與點也。

子路第十三

子曰；誦詩三百、授之以政、不達、使於四方、不能專對、雖多、亦奚以爲。

季氏第十六

陳亢問於伯魚曰；子亦有異聞乎。對曰；未也、嘗獨立、鯉趨而過庭、曰、學詩乎。對曰、未也、不學詩、無以言、鯉退而學詩。

陽貨第十七

子曰；小子、何莫學夫詩、詩可以興、可以觀、可以群、可以怨、邇之事父、遠之事君、多識於鳥獸草木之名。

子謂伯魚曰、汝爲周南召南矣乎、人而不爲周南召南、其猶正牆面而立也歟。



何序

我邑山川靈秀、文物清華。世稱魚米之鄉、代盛簪纓之族。書香門第、沐王謝之流風。揆藻天章、續漢唐之逸韻。詩人薈萃、獻籍綿長。基所自焉、良有以也。節廬竹平宗長、情深桑梓、學注蟲魚。廣集前修、哀成專輯。掇連逮範、品類兼賅。由明代以至民初、自士夫而迄閨閫。春蘭秋蕙、各異畹而同芳。藍脇號鐘、應四時而協奏。乃若秋風擊筑、蕭騷變徵之音；斗室彈棋、坎壈不平之局。索知音而孰和、怨來日之大難、此其一也。乃若瑤京夢淺、按譜而唱雲璈；玉宇天寒、尋聲而翻水調。楊柳曉風之句、井水知名；桂枝故國之篇、斜陽成恨。此其二也。乃若林影卓午、車聲到門；朋簪忘年、芳樽接席。永笑言於一室、聯裙屐於異苔。蘊詩思之如潮、挹花香而入戶。此其三也。乃若燕南趙北、慷慨悲歌；越角吳歛、迷離羈旅。庾信哀時而隕涕、物極周星；屈原遲暮而行吟、情悽攬揆。飄風萍絮、恂怳河山；審雨槐柯、摩挲冠劍。此其四也。乃若旗亭傳黃河之唱、畫壁相矜；蠻徼綉春雪之詞、弓衣都遍。胥疏自好、响沫同資。擷騷雅之幽馨、發江山之文藻。此其五也。乃若夢迴蕉鹿、感念銅駝。人民有城郭之嗟、風景懷山河之異。逃虛之侶、據梧而興詠哦、去故之思、宿桑而生眷戀、此其六也。要皆聲諧金石、詞蔚丹青。哲人襟影之觀、志士唾壺之感。悟流光於炊黍、慨身世之浮漚。元豐歌行、悉關掌故；杜陵詩律、都屬史材。故雖片玉碎金、俱堪傳世者也。叔惠修名未立、徒讀父書。莫攀啜粟之歡、愧習過庭之訓。節廬不嫌譴陋、授命爲文。勉效馳驅、深虞僭越。所冀鄉邦君子、儒林丈人、錫以箴規、摘茲蕪累。薰香奉手、銘禱奚如、是爲序。

公元一九九六年歲次丙子孟秋水藤何叔惠於九龍城南樓

## 陳序

昔者、孔子刪詩書、定禮樂、並以詩禮訓其子及諸門人。蓋禮以立身、詩以言志、言爲心聲、讀其詩則可知其人與鄉土之文化、故觀文風者每求於聲詩。順德自明景泰三年（公元一四五二年）開縣以來、廣敷文教、五百餘年間、藝文以詩爲盛、代有名家。或歌頌昇平、或鍼砭世俗、或傷時感事、或觸景興懷、或取自然、或抒孤憤、各言其志、蔚爲大觀。邑彥何竹平先生、乃多方搜集、彙而輯之、得明人一百二十一家、清人二百五十三家、近代一百十三家、名之曰順德詩徵、用存鄉邦文獻。其中以代遠年湮及屢經世變、雖有詩名而無從得其遺作者、歎付闕如。先生天性孝友、文而有禮、才華敏捷、和光同塵、對復倡孔學尤盡心力。他如興學育才、恭敬桑梓、又任香港最具規模與歷史之學海書樓（公元一九二三年創立）主席、禮賢講學、嘉惠士林、皆大有功於名教。且其律己嚴而待人恕、實爲端人、今所輯者、吾知其所取必端、足以風世、是真仁人君子之用心也、予深重之而樂爲序之。

公元一九九六年歲次丙子立秋容山陳秉昌於近朱室

## 何序

順德居珠江三角洲之中，東連番禺，南接新會，西鄰南海，北倚佛山，水道縱橫、基塘交錯，昔爲魚米豐盛之鄉、今稱工商發達之市，雖無名山大川之壯觀、卻有雲塔錦巖之勝景、是以文物薈萃、人才輩出。鳳嶺朝暉、鹿徑松蔭、旣楨玉而葳蕤，狀元探花、儒林學士、復渾金而陣筆、猗歟盛哉。夫文固尚矣、而詩亦足感人、故歷代士民、吟詠性情、述志抒懷、皆托於詩。或染雲而摘句、或鏤水而生花、踵美前修、庶幾流芳、傳之久遠。是以我邑詩人、代有俊夔、若陳獨漉恭尹、張藥房錦芳、黃虛舟丹書、黎二樵簡、黃晦聞節等諸大家、挺出嶺南、聲聞中土、固足光吾讜之大矣。然而靈草落花、足堪尋拾、星斗雲煙、亦宜聯攬、桂



洲宗長竹平先生、軒昂俊逸、博學多才、尤邃於詩、心存芸帙、意寄墨庄、手持珊網、蒐摭群書、爰自明季、迄於近代、輯錄詩文凡四百八十餘家、別集單編、都爲巨冊、名之曰順德詩徵、洋洋大觀、洵大有功於鄉邦文獻者也。惟文如金玉、欲免埋沒於一時、使其精光色采常不晦失者、當收而寶之、始可長供世賞、光澤永存、行成稀世之珍也。先生是編、信類此矣。夫如是、則我順德五百多年來歷代詩人之作、得先生而後可徵也。

公元一九九六年歲丙子荷月大良何沛雄序於香港大學

時彥題詠

大良陳泰階年方九十一

鳳城佳色儼星羅、華蓋橋橫屬柳波。桂海渡江船上下、西山負郭廟巍峨。石湖煙雨漁舟鬧、雲路桑麻耕戶多。難得何郎揮妙筆、地靈人傑搜經過。

大良潘小磐餘菴

古廟鐘樓二海環、峨峨雙塔白雲間、試翻篇翰懷前哲、文采依然照鳳山。

大良李狷齋

皇皇傑構震南天、千古風騷集邑賢。文物不隳吾鄙秀、按我邑在百粵文壇之中宿有南清順秀之雅譽云扶輪猛著祖生鞭。存亡續絕寧常事、振弊興衰獨領前。來日文章回國運、廬江一老合凌煙。

大良李秀南

示我詩徵倍感親、逾年收集費精神、研騷治史咸方便、傳統弘揚啓後人。

容奇梁耀明鏗齋

文物鄉邦五百年、詩家遺作萬篇傳、鳳城代有騷人出、風教山川兩使然。

容奇李本立

鳳嶺靈光鍾毓秀、太平神步兩巍妍、金聲逸韻傳鄉土、文采風流五百年。

容奇岑 文

順邑風騷祖武繩、淋漓翰墨引詩徵、鄉音卓礫堪傳世、五百餘年氣益增。

龍山鄧瀚鈞

鏤金錯采極輝煌、喜見前賢錦繡章。星聚奎樓才輩出、雲凝青塔士趨跄。當年蠟淚爭流盡、此日驪珠競發光。不有昭明文選佚、千秋功業與天長。

龍山陳潘思敏茹香

春風十里柔桑地、士庶夷清且惠和、五百餘年編什富、宗唐宗宋邁餘波。先生直諒多聞士、尊孔扶經第一功、文獻鄉邦勤校理、斯須之敬幾人同。

龍山周永康

欣逢盛世輯詩徵、萬紫千紅照眼明、鳳嶺文風源久遠、鄉音處處總關情。

水藤何叔惠薇龔

鳳城風雅萃三朝、南海明珠未寂寥、不廢江河流日夜、論功合讓阿龍超。溫柔敦厚詩之教、人物山川地以靈、留得鄉邦文化在、式如金玉仰儀型。

水藤何幼惠

鳳嶺斯文分別傳、節廬辛苦彙成篇、願言閭里風騷在、踵武揚芬仗後賢。

水藤何乃文

五百年文獻、驪探不厭深。棗梨悠久業、桑梓敬恭心。風俗堪稽古、雲煙合至今。直須凌鳳嶺、披卷發龍吟。

羊額馮影仙

滿紙紛披琬琰辭、昔賢才調最欽遲、鳳城自古多文秀、雲塔憑將一卷支。



沖鶴潘鎬澄

鳳嶺詩家湧若雲、草萊臺閣並多文、一書壽世覘弘毅、搜逸鈞沉不憚紛。

倫敦蔡任平

峰高一邑錦岩山、耕野人家綠水環。月夜漁歌橫浦唱、晚山樵帶夕陽還。三宗文物邦家重、十二鄉賢史冊刊。不爲滄桑人景仰、詩徵一卷仿追攀。

江尾羅妙馨

順德山川秀、鍾靈人物奎。篇章多散佚、珠玉待蒐擠。匯此存文獻、哀之栽棗梨。先賢如有作、後覽喜能稽。頑鈍開茅塞、詩詞闢徑蹊。輯成新卷帙、導引舊階梯。編者徵詩敘、欣然命筆題。

沙滘陳公望

歲月滄桑幾度遷、今賢數典紀前賢、詩徵一部輝煌甚、文采風流賴此傳。

桂洲梁荔夫

鳳山長引鳳來儀、輩出人才代有詩、邑井風流誰可括、大昕擊鼓校參差。

黃涌關應良止善

桑梓先賢德望崇、遺章萬首見高風、千秋佳句誰徵得、何丈應居第一功。

良村冼燮培

西山廟前玉泉碑、鳳嶺人家近代詩。

勒流麥寶霖

鳳嶺因風發、書香世代傳。

明代天聲

葛岸岑滌羣時年九十六





詩集	作者姓名	頁次	詩集	作者姓名	頁次
鬱洲遺稿	梁儲	十七—十八	狂仙遺草	梁可瀾子夢陽	三十二
蘭汀集	梁有譽	十九—二十一	未央存稿	梁朝鐘	三十二
西麓吟草	梁有貞	二十二	碧灘釣叟詩	黃士俊	三十三
東方集	梁有年	二十二	影木軒集	黃儒炳	三十三—三十四
飄零吟草	梁有謙	二十三	敦仁堂稿	黃維貴	三十五
昔莪集	梁亭表	二十三	春暉堂稿	黃聖期	三十六—三十七
述之吟草	梁若衡	二十四	薛菴齋詩集	黃聖年	三十七
白雲詩選	梁柱臣	二十五	應洲詩草	黃在裘	三十八
泰臺詩存	梁紹震	二十五—二十六	仙石洞稿	黃朝賓	三十八
自鳴集	梁岳	二十六	北征草易軒集	黃公儀	三十八
偶然堂集	梁元柱	二十七	抱真集	李孔脩	三十九—四十
寒塘詩存	梁器甫	二十七	亦武之音	李德彰	四十一
平齋集	梁喬升	二十八	北山歸叟集	李聰	四十一—四十二
畫中之詩	梁孜	二十八	樵懷集	李際明	四十二
鶴山集	梁文冠	二十九	幽居吟草	李萬齡	四十二
壺山集	梁景行	二十九	雅音會編	康麟	四十三
荊州集	梁夢雷	三十	一溪詩存	黎億	四十三—四十四
玉林集	梁繼善	三十一—三十一	題壁詩	黎宏業	四十四
綺園蕉筒集	梁佑達	三十一	抑菴集	黎天啓	四十五

草堂集	黎紹詵	四十五	南墅集	陳克侯	八十一—八十一
羅陽集	潘梅	四十六	敬齋吟草	陳珉	八十一
滋蘭集	潘光統	四十六	穎川吟草	陳光穎	八十二
綱翁集	余經	四十七	蘭軒詩草	陳雲仙	八十二
篋中集	余玉馨	四十七—四十八	定性澄心詩草	何彥	八十三
綠野堂集	吳譽聞	四十八	朗吟軒稿	何其睿	八十四
留餘集	林志孟	四十八	梅花詩稿	何維翰	八十四
虞部集	歐大任	四十九—五十一	羅峰詩存	何衡	八十四
瑤玉齋集	歐必元	五十一	不去廬集	何不偕	八十五—九十三
醉吟草	歐主遇	五十二	江右詩存	余光裕	九十四
最樂集	歐芬	五十三	山人集	余世亨	九十五
滄浪洞集	區龍正	五十三	斗南詩草	余嘉詔	九十五—九十六
翼翁吟草	鄭翼	五十四	蘭陽吟草	余祖頤	九十六
叔翁吟草	鄭應文	五十四	吹劍集	蘇葵	九十七
淵翁吟草	鄭用淵	五十四—五十五	古愚集	蘇仲子方晉	九十八—九十九
佐翁吟草	鄭佐	五十五	都諫稿	蘇應旻	九十九
勾漏詠集	鄭學醇	五十五	讀易堂稿	蘇昇	九十九—一〇〇
村獠畫餘	彭竹本	五十六—五十七	桐柏山房集	蘇景熙	一〇〇
雪聲堂集	陳巖野	五十八—六十一	南枝草堂遺稿	薛始亨	一〇一—一〇二
獨漉堂詩	陳恭尹	六十二—七十九	本末山房稿	薛起蛟	一〇二



石林清嘯集

張佃

一〇三

一德稿

趙不易

一一五

張生詩存

張鳴韶

一〇三

迎西館集

趙不踰

一一五

貞民之詩

張秉壬子善昭一〇三一—一〇四

閒言集

趙善諫

一一五

虛齋詩存

張拱辰

一〇五

朱烏洞集

趙善鳴

一一五—一二六

治齋吟草

張淮

一〇五

東臺集

趙崇信

一一六

張氏正聲

張濛

一〇六

劉氏吟草

劉觀光

一一七

靜觀之得

張鏢

一〇七

杜門吟草

劉士奇

一一七

沙富流風

張希載

一〇七

汝翁吟草

洗光

一一八

綠樹山房集

張在瑗

一〇八

鰲翁吟草

雲上行

一一八

雪崖詩草

張彥修

一〇八

甘氏吟草

甘學

一一九

平臺詩草

張洙

一〇八

鍾氏吟草

鍾呂

一二〇

景翁詩草

張溥

一〇九

柴門笑吟

鍾政

一二〇

居易閒吟

張鑰

一〇九

碧天嘯草

鍾千

一二〇

張老詩存

張應泰

一一〇

羅氏吟草

羅良信

一二一

蒲谷集

岑萬子用賓一一〇—一一一

石渠洞詩

韋憲文

一二一—一二二

一樹齋集

馮昌歷

一二二

紫雲圃吟草

務光子

一二二—一二三

驟背吟草

馮元基

一一三

棲壑和尚集

釋道邱

一二三

紫雲閣詩集

馮顯忠

一一三

西窗遺稿

釋今嚴

一二三

金峰酬唱

馮玉振

一一四

今印詩存

釋今印

一二三—一二四

深竹閒園吟草

趙鶴良

一一四

公字叔厚、又字藏用、號厚齋、晚號鬱洲、生於明景泰二年、公元一四五一年、鄉籍石碕、先世本宋丞相梁克家之後、克家乃宋乾道八年、公元一一七二年官拜右丞相兼樞密使、原籍泉州晉江、支派分流至立縣初、由南雄珠璣巷來遷。父祖順、誠直尚言諾、安靖鄉鄰甚力、鄉人甚德之。儲生有異相、幼即穎悟、受業於新會陳獻章白沙先生門下。明成化十四年戊戌、公元一四七八年登進士、授翰林院編修、官歷書經局校書、主考順天鄉試、東宮侍讀、教習庶吉士、遷吏部侍郎以至會試主考、太子太師、蓋華殿大學士、位居首揆。公立朝四十餘年、議論每持忠厚、無賢不肖、皆稱長者、紀在庶寮、引入輔政、爲有明一代名臣。至老歸隱。卒於嘉靖六年丁亥、公元一五二七年、壽七十有七、入祀鄉賢。訃至朝廷、帝爲悼念、輟朝一日。列傳見咸豐縣志、詩章見溫汝能纂輯之粵東詩海、復見鄒崖逋者鈔讀之嶺南詩存、又得廣州市中山大學古文獻研究所陳永正提供詩稿。

元夜應制

雲中珠翠壓鰲頭、雉尾雙雙護冕旒、聖主經年少巡幸、春來方覩屬車遊。

次簡正郎韻

歲歲乞歸休、銜恩尚勉留。形容空自老、松菊爲誰秋。病豈堪朱紱、天應念白頭。秋鴻莫先去、期傍我行舟。

次春日述懷韻

南國春風早、鶯花動客情。故鄉難夢到、羈客易愁生。白髮行俱變、丹心祇自明。不知從此去、何處憶韓荆。

金門待漏院試作



十年丹屐夢中情、幾向長安對月明。鳳闕未曾開曙色、龍池先已聽鐘聲。焉知落落孤蹤士、獨抱區區萬里誠。卻恨相如獻詞賦、不將憔悴及蒼生。

元夜

今春原自隔年回、先向南枝報早梅、尚恐閨闈春色淺、故教絲管夜相催。

都城曉日

雲散扶桑曙色開、旭暉初射紫金臺、早催龍馭臨舟辰、遠燭紅光照九埃。

送秀水王教諭

自從別君來、寒暑幾更代。相逢始握手、重有別離慨。嗟君早知學、及長慕沖退。群誇自不休、我默固長在。昔年被薦剡、侯門早韜晦。庠序比需賢、復爾司教誨。菁莪豈不佳、菽水況可逮。歸成迎養歡、此樂誰所賚。人生知足耳、白髮古不貸。南國幸多蘭、相期倍紉佩。

附載【明代歷朝年號】自洪武至崇禎爲二百七十七年至南明永曆爲二百九十四年

洪武：公元一三六八年至公元一三九八年。弘治：公元一四八八年至公元一五零五年。

建文：公元一三九九年至公元一四零二年。正德：公元一五零六年至公元一五二一年。

永樂：公元一四零三年至公元一四二四年。嘉靖：公元一五二二年至公元一五六六年。

洪熙：公元一四二五年至公元一四二六年。隆慶：公元一五六七年至公元一五七二年。

宣德：公元一四二六年至公元一四三五年。萬曆：公元一五七三年至公元一六二零年。

正統：公元一四三六年至公元一四四九年。天啓：公元一六二一年至公元一六二七年。

景泰：公元一四五零年至公元一四五七年。崇禎：公元一六二八年至公元一六四四年。

天順：公元一四五七年至公元一四六四年。弘光：公元一六四五年至公元一六四六年。

成化：公元一四六五年至公元一四八七年。永曆：公元一六四七年至公元一六六一年。

蘭汀集

梁有譽

先生字公實、鄉籍乾涇。父世驃、明正德庚辰進士、官歷福建按察僉事。有譽承家學、舉明嘉靖二十九年、公元一五五零年進士、授刑部主事。與李攀龍、王世貞、宗臣、吳國倫、徐中行、謝榛唱和、稱中原七子、與歐大任、黎民表、李時行、吳旦稱南園後五子、著有蘭汀集。時嚴嵩柄國、有譽恥且畏焉、遂以養母請歸、杜門讀書、某歲偶以舟遊羅浮遇颺感寒、歸家遽卒、年僅三十六、受祀鄉賢。事略載羊城古鈔、詩章同見於鄒崖逋者鈔讀之嶺南詩存。按黎民表字維敬、從化人。李時行字少階、番禺人。吳旦字蘭皋、南海人。

秋夜雨中過黎氏山房

瑤琴不復理、空餘山水情、棄置石床上、風來時一鳴。

秋日越臺登眺

越臺枕郊郭、吟眺喜逢秋。山向庾關斷、江從鬱水流。菊湖荒蘚沒、花塢夕陽愁。極目皇圖外、蒼蒼雲樹浮。

又

南國新秋至、憑高憶所歡。欲裁芳杜曲、遙寄碧雲端。落木城邊暮、孤鴻天際看。危岑一以眺、滄海正漫漫。

送吳山人遊北嶽兼謁蘇公墓

爾作西京客、還尋北嶽遊。黃雲經紫塞、白髮憶丹邱。久謝區中累、行參幕下籌。懸知登覽罷、長嘯拂吳鉤。

過清遠江口

斷靄迷青嶂、寒湍滾白沙。地荒空置戍、城古尚棲鴉。今昔殊瞻眺、江山感歲華。壯遊良可



賦、擊楫思無涯。

遊羅浮阻風大唐田舍

曾聞漢鮑靚。海上阻秋風。我亦羅浮去、飄飄煙雨中。魚龍舟子懼、雞黍野人同。暫憩茅簷下、滄洲興不窮。

于麟與子相元美過訪懷謝茂泰

把酒情猶昨、風塵路渺漫。交深任朝野、名重有饑寒。花鳥愁邊賦、山川亂後看。西園幾遊眺、景物豈長安。

豐城道中

風煙渺無際、孤棹去悠悠。多病長爲客、思鄉況屬秋。樹圍平野闊、江湧衆山浮。卻望雲中雁、緘書寄遠愁。

雜詩

圓象無停晷、四序迭相循。曄曄春華歌、歛忽委埃塵。候蟲善審時、鳴鳥常司晨。如何建名士、遲暮多苦辛。衝波鮮安舟、歧路恆摧輪。順風響易遠、卻行難及人。鐘鼎鐫峻功、竹帛垂逸民。靜躁雖殊域、德業終同倫。慷慨感中情、高駕良可遵。

又

我行彼中野、靡靡令心憂。四顧莽無人、但見林與丘。高臺多悲風、滄海轉洪流。走獸駭叢莽、號鳥求匹儔。顧茲震心魄、欲去將何求。古來賢達人、高視隘九州。嗟哉愚蒙者、睽戀區中謀。雍門泣孟嘗、牛山悲爽鳩。聞彼代謝理、蒞物恆怨尤。黃鵠摩霄舉、騰蛇乘霧游。斥鷃爾何陋、枋榆徒啾啾。知自有大小、達觀德彌優。

北山訪友不遇

竹塢無塵日已曛、數聲啼鳥隔花聞、平蕪一望涼風起、吹落江城萬樹雲。

又

此日相期汗漫遊、猶尋猿鶴北山頭、池塘花落無人管、空鎖蟬聲一院秋。

燕京感懷

鹿塞弋鏃血未乾、龍廷烽火報長安。擬禽頡利先開幕。欲拜嫫媧更築壇。青海月明胡馬動、黃榆風急阜雕寒。材官羽騎多如雨、夜夜旄頭倚劍看。

姑蘇懷古

青山幾日到吳中、詞客登臨感慨同。金虎蹟荒靈氣滅、水犀軍散霸圖空。春歸茂苑烏啼月、花落橫塘蝶怨風。誰識倦遊心獨苦、扁舟常憶五湖東。

崖門弔古

誰悟當年識己真、汴杭回首總成塵。憤無勾踐三千士、死恨田橫五百人。海上乾坤春夢短、崖前風雨國仇新。貞魂若作啼鶻去、葛嶺峰頭哭萬巡。

盤江驛阻雨寄門人汪維

天連益部長多雨、路出盤江況毒淫。春早蟄龍蒸赤水、夜深山鬼嘯青林。己憐道遠妻孥累、更恐年衰瘴癘侵。吹笛袁生今好在、懷余應和武陵吟。

懷羅浮吟節錄

長劍欲倚崑崙邱、深杯欲吸滄海流。古人意氣徒爲爾、今人局促隨犛牛。我生胡爲苦百憂、五湖卜築仍淹留。側身天地箭滿眼、令我東望懷羅浮。此山往往精靈聚、朱明耀真通十洲。七十二室二石樓、鐵橋虹起凌炎陬。地脈潛連洞庭口、天臺下瞰溟海頭。九陽倒掛扶桑折、朱光反射巖巒幽。軒轅纔及熊相返、大禹九山封即休。



西麓吟草

梁有貞

先生字西麓、鄉籍乾滄、有譽之弟。明嘉靖壬子、公元一五五二年舉人、官歷綿州知州。事略見咸豐縣志選舉表、詩章見溫汝能纂輯之粵東詩海卷二十八。

海珠寺謁李忠簡公二首

有宋遭中葉、南溟起哲人。生平多節慨、在位以經綸。事業先編簡、儀型肅縉紳。千秋一祠宇、像貌見江濱。

畫棟水晶宮、名賢想像中。前朝瞻令德、異代仰高風。古木橫簷碧、滄波浴日紅。豐功留祀典、瞻拜思無窮。

東方集

梁有年

先生字書之、號惺田、鄉籍古朗。明萬曆乙未、公元一五九五年進士、登翰林院、歷授吏禮刑三科給事、奉使朝鮮、賜一品服、郤餽金、朝鮮君臣咸異之。在諫垣七年、風裁奕奕、一時皆慕重焉。歷任浙江右布政、鄖陽巡撫。所至著績。卒祀鄉賢祠、霸州祀名宦祠。著有東方集。事略見咸豐縣志、詩章見溫汝能纂輯之粵東詩海卷四十二。

出關

關門一線帶全遼、斷續雲山引使輶。短草春深能長少、冥鴻天外欲歸遙。煙臺歷映城闐密、漢陌平延獵騎驕。信是力分防易弱、何時東顧隱憂消。

朝天石

仙客朝天去不還、馬蹄穿石跡猶傳。祇應化鶴歸來日、依舊蒼山鎖暮煙。

快哉亭

披襟亭上瞰江流、不負乘輶萬里遊。縱目虛簷何所快、晴波如縠散汀洲。

飄零吟草

梁有謙

先生鄉籍待考、明代布衣、詩章見溫汝能纂輯之粵東詩海卷四十三。

朱將軍夜宴

綺筵歡清夜、雙姬況妙齡。輕風迴舞袖、涼月轉歌屏。樓帶池光白、樽兼五色青。不須今夕酒、何以慰飄零。

永安元夕憶林徐二子

燈夕煙花好自親、鞦韆蠻女踏歌頻。絕憐短鬢看佳節、隨意低頭憶美人。酒裏競孤千里月、風前虛度九枝春。年來不淺飄零色、小傍詩名老葛巾。

昔莪集

梁亭表

先生字無疇、鄉籍碧江、明萬曆丙午、公元一六零六年舉人。官歷大埔教諭、擢陞國子監助教、吏部司務、員外郎、南安府知府、南京兵備道兼撫蠻使、著有昔莪集。事略見咸豐縣志選舉表、詩章見溫汝能纂輯之粵東詩海卷四十三。

鳳城謁韓昌黎祠

遠韻懸今古、雄文泣鬼神。從來香案吏、多作謫居人。瘴厲江花冷、松杉廟貌新。眉山堪接武、莫惜共沉淪。

都門雜詠

傍日長安擁禁城、經霜短鬢老塵纓。奪將故里山居癖、博得金門吏隱名。鵷鷺曉鐘隨侍詔、鼓鼙高壘盛談兵。年來事事勤宵旰、不盡憂勞攬轡情。一官雞肋寄清真、槐市頻看藻色新。幾尺琅玕蘇病骨、十年圖史稱閒身。詞場自分功名薄、香篆偏宜篋笥貧。笑殺彌衡虛走刺、貴遊何用強相親。



述之吟草

梁若衡

先生字簡臣、亭表之子。事親至孝、少年讀書、輒廢寢食。明崇正庚午（崇禎三年）公元一六三零年舉人。庚辰特賜進士、授永福縣令、地半獐獠、素稱難治、若衡爲之化導、寬嚴並用、境乃大安。及明末、南海陳子壯舉兵時、若衡應之、事洩、爲清兵所執、殉節而死、祀忠孝祠。列傳見咸豐縣志、詩章見溫汝能纂輯之粵東詩海卷四十九。

三水送家大人之任北雍時十月之望

嶺樹煙雲此問津、朝來菱彩映江濱。澄清更爲憂時急、湛露今承寵命新。虎觀談經環禮樂、彤墀鳴珮曳星辰。匆匆計日長安近、正喜銀幡賜侍臣。

又

蕭瑟寒風萬里程、問衣還苦別離情。藜燈自是家聲舊、璧水如同宦況清。雪滿新豐催去馬、花明帝里喜遷鶯。從容匕箸加餐飯、幾度臨風念遠行。

署西始闢草岸物外蕭然清閒徐步援筆賞之

綠樹濃陰護短牆、何妨枳棘借他鄉。誅茅署後三春暖、剪綵庭前百和香。月浸樓臺渾近水、煙寒橘柚欲肥霜。憑闌更對新萸莢。自愛舒徐歲月長。

江上和胡先生

陣陣金飆動葦蘆、那堪書劍半長途。天連濁浪浮三島、目斷虹橋帶五湖。雲白雁來人對酒、花開秋盡客思鱸。相逢莫漫嗟留滯、異地同聲自不孤。

旅次

朔風吹雁斷菰蘆、楚水吳山問去途。十載煙霜餘夢寐、經霜書劍半江湖。一舟明月心何似、萬里浮雲意與俱。天若有情天未老、甚因世上有賢愚。

## 白雲詩選

梁柱臣

先生字衡南、鄉籍龍頭、明嘉靖末進士、官歷馬龍州知州、文林郎大理寺右正、萬曆十一年縣城大成殿重修時、曾寫重修儒學記一篇、鐫碑以立學宮。事略見咸豐縣志、詩章見公元一九九三年廣州白雲山建設管理處出版白雲山探勝之白雲詩選。又見粵東詩海卷廿六。

### 白雲山尋安期生飛升處二首

安期仙隱白雲隈、石室丹鑪鎮碧苔、一自仙蹤霞舉後、白雲長繞鶴舒臺。  
賣藥仙翁去不還、空留靈跡在人間、相逢莫問如瓜棗、九節菖蒲可駐顏。

### 別燕京作

煙郊立馬獨躊躇、去國身悲萬里餘。燕市春光何日醉、潞河楊柳病中舒、高臺寂莫曾招駿、滄海歸來擬釣魚。誰向周南歎留滯、風塵一望正愁余。

## 泰臺詩存

梁紹震

先生字原東、鄉籍桂林、今屬北潯林頭。早年苦學、明隆慶五年辛未、公元一五七一年舉人、歷任淮安教諭、山西同考、陞國子監博士、一時俊彥、多出其門下、作有正學論、以示子孫。平生未嘗少有倨容、閒常與歐大任、黎惟仁輩結社、世稱泰臺夫子、卒祀鄉賢。列傳見咸豐縣志、詩章見鄒崖逋者鈔讀之嶺南詩存。又見溫汝能纂輯之粵東詩海卷三十四

### 經靈洲山

金山山下、清夜洞門開。說法林猿聽、焚香野鶴回。欲尋蘇學士、更上妙高臺。悵望情何極、難將客思裁。

### 秋興

梧桐飛葉帝城隈、正是寒期素節催。玉女吹霜搖碧落、仙人擎露在蓬萊。時聞作賦凌歊館、



追憶相從戲馬臺。晉宋風流俱寂寞、登臨懷抱向誰開。

送丁山人遊粵西

家住飛雲最上頭、別君長笑出羅浮。吳松不入山人夢、遼鶴常隨野客遊。彩筆浪吟虛白社、黃金買醉倚青樓。玉姬歌罷無持贈、采采芙蓉八月秋。

自鳴集

梁岳

先生字仲登、鄉籍大良。明隆慶庚午、公元一五七零年舉人、官歷瑞州推官。事略見咸豐縣志選舉表、詩章見溫汝能纂輯之粵東詩海卷三十四。

白雲精舍聽張仲欽彈琴

已得青山勝、還聽綠綺琴。美人真絕調、遊客愧知音。衆壑風泉響、懸崖霧雨沉。醉來頻徙倚、疑聽九龍吟。

暮春懷訶林舊隱

伊昔還山時、結廬依古寺。繞砌植松篁、環軒披薜荔。春色入虞園。四顧羅蒼翠。石池湛碧空、水暖游鱗戲。閉戶謝鶯塵、逍遙忘俗慮。頗諧靜者心、稍適幽栖志。一朝謁承明、射策不得意。薄宦繫微軀。欲返焉能至。新恩詎易酬、舊業忽如棄。佇想春風深、落花應滿地。

翠微閣晚眺

絕頂躋攀路不迷、醉憑飛閣訪禪西。微茫下界諸峰小、指點平原萬木低。舟壑煙深迴鶴馭、綠楊春暖聽鶯啼。綵毫擬就登高賦、不數任翻壁上題。

曉過穀城寄張明府

遠道驅車過穀城、江天旭日轉新晴。芳郊隱映千花麗、碧樹遙連百雉平。春盡浦雲低雁字、風和柳谷緩鶯聲。行邊剩有雙龍在、不遇張華祇自鳴。

偶然堂集

梁元柱

先生字仲玉、又字森琅、鄉籍倫敦、明天啓二年壬戌、公元一六二二年進士、授庶吉士、官歷御史掌陝西道、旋以國家變動、常處主憂臣辱大義凜然之際、及連丁內外之艱、乃不幸早卒、年僅四十有八。及清室既定、在雍正間獲祀鄉賢、遺著有疏要四卷、偶然堂集四卷、列傳見咸豐縣志、詩章見鄒崖逋者鈔讀之嶺南詩存。又見粵東詩海卷四十五。

飲清江署中

何年別燕市、此日復相親。迎客花封縣、哺雛雉狎人。萬里雙龍劍、三秋一葉身。經年惜良會、未信馬蹄頻。仲玉上疏劾東廠逆監救楊椒山廷杖放還

入館言志

結髮事孔顏、囂囂恣仰止。壯懷久拓落、一日副知己。儒冠不誤人、況乃私天子。堯舜不再生、夔龍未終死。中夜激衷腸、耿耿圖學士。丈夫遇明時功名安足比功名豈能捐所保在廉恥

寒塘詩存

梁器甫

先生本名槿、號寒塘、鄉籍大良。生於明崇禎元年戊辰、公元一六二八年、卒於清康熙十二年癸丑、公元一六七三年。父在廷、官歷敘州同知。器甫早歲感慨時艱、每思投袂而起、但終落落無所成就、盛年自廢、乃結茅池西、匾曰寒塘。復與同邑陳恭尹、何不偕、何衡、番禺陶璜、作同聲之酬唱、遣遺民之歲月、時稱北田五子。事略見陳荆鴻著之藝文叢稿、詩章見鄒崖逋者鈔讀之嶺南詩存。

送何不偕之潮州

擾擾不得志、客心安可論。古關羸馬路、窮海惡魚津。驛葉行邊落、籬花到日新。遨遊無不可、天地一閒人。



平齋集

梁喬升

先生字以順、鄉籍待考、明正德庚辰、公元一五二零年進士。官歷刑部主事、遺著有平齋集、事略見咸豐縣志、詩章見溫汝能纂輯之粵東詩海卷二十一。

常山阻雨懷同年詹黃門

去年懷玉雨、雅情多荷君。撥鑪煨雪酒、剪燭細論文。五日方上馬、新晴照吟襟。行行尚不忍、一步一沉吟。今年當山雨、滴滴上我心。山亭睡不著、岑寂寒難禁。美人隔一山、路近無由親。悉見黑雲翳、悵望楓樹林。安得北風勁、吹散重雲陰。旭日融融起、輿帷生氤氳。我爰挾我劍、我爰囊我琴。相見立相期、共話寒更深。

海珠寺謁李忠簡公祠

兀然一石江心浮、撞破江潮兩道流、若把名祠品題遍、海珠端合在前頭。

畫中之詩

梁孜

先生字思伯、鄉籍石碯、乃有明一代大學士梁儲之孫。少有逸才、詩近中唐、畫追宋元、書得文徵仲法云。官歷禮部主事、員外郎。事略見咸豐縣志、詩章見溫汝能纂輯之粵東詩海卷二十一。

耦花館

雨過湘雲卷、風迴翠浪平。蟬喧低岸柳、魚避泛舟萍。賞趣緣山水、忘懷得友生。如何五嶽去、方稱逸人名。

雲谷書院題壁

野客愛清秋、樵山覓勝遊。峰連五嶺色、泉瞰大江流。把袂雲隨杖、停杯月滿樓。谷中堪結侶、高臥桂叢幽。

鶴山集

梁文冠

先生字華卿、鄉籍鼎新、少時體弱多病、晚居古谷、自稱古谷老人、嘗從新會陳白沙先生游、著有鶴山集、爲有明一代處士。見溫汝能纂輯之粵東詩海卷十六。

寄男京邸

羅粉漫天雪雨來、松濤砍樹朔風迴。北京旅邸寒應甚、南海漁家晏未開。萬里幾番孤夢破、三年一別六書回。白頭舐犢心猶在、祇恐囊空欠夜煤。

壺山集

梁景行

先生字宗烈、鄉籍鼎新、文冠之子、明宏治己酉、公元一四八九年舉人、官歷崇明知縣、鎮江府同知、壽府長史、歸隱壺山、學者稱之爲壺山先生。嘗隨父偕弟景孚游於陳白沙之門、俱得白沙之傳、著有壺山集。事略見咸豐縣志、詩章見溫汝能纂輯之粵東詩海卷十七百鳥圖爲司空李西涯題

乾坤萬象真留形、誰家畫史傳分明。羽毛變化極纖巧、模象彷彿傳其精。千迴萬轉各殊異、東塗西抹如生成。鷺浴晴波蕩鳧雁、鸕翻遠渚盟鴝鵒。雛鷺老鸕浮河白、眠鷗舞鶴迷田青。鴛鴦欲動灘灘止、烏鵲翔集鸛鷓驚。並坐枝頭見黃鵠、搖曳原上鳴斑鳩。玃玃狻狻鷓鷓起。栖栖昵昵栗留停。暮雨江南鷓鴣濕、秋風北海搏鷓清。鷓鴣能言笑鳩拙、鸚鵡解語誇鸚靈。鷓鴣凌厲卑鷓鴣、鸚鵡衝突欺鷓鴣。搶榆斥鷃不處木、差池鷓鴣仍催耕。鷓鴣白雉貢異國、翡翠大鳥來南溟。鷓鴣鷓鴣自驚悚、鷓鴣鷓鴣喧相爭。赫赫鷓鴣與鷓鴣、嗅嗅鷓鴣群翁鷓。鄧林啄木聞夜靜、珠樹鷓鴣知風生。子規百舌競來往、畫眉倒掛頻叮嚀。太平天子御宸極、九苞丹鳳來虞廷。回頭一顧韶簫作、啁啾百鳥俱無聲。我從何處見畫本、司空李氏今名卿。欲留數語話端的、卻愧才非杜少陵。



荊州集

梁夢雷

先生字明森、一字鳴霖、鄉籍倫敦、元柱祖父。明嘉靖辛酉、公元一五六一年舉人、官歷荊州府通判、政多奇跡、萬曆間各省亢旱、而荊州尤甚、夢雷晨出禱雨、途遇一道士、如瘋狂狀、夢雷異而問之、自言能致風雨、遂令築壇數尺、甫登壇、即風雨大作、各處霑足、土民大悅、咸謂惠愛感動上天所至、因與道人歸、中途道人謂夢雷曰、公德及人多矣、但仙召有期、可去官速歸、言罷、遂失道士所在、乃信其言、果歸家踰月而卒。著有荊州集。列傳見咸豐縣志、詩章見溫汝能纂輯之粵東詩海卷三十。

登太和絕頂

磴道攀緣謁帝扉、脚跟斜傍五雲飛。天臨萬仞開糸宅、地擁千靈護紫微。幻夢始從三昧覺、青山今有幾人歸。騎羊東去羅浮近、獨倚天門笑拂衣。

二月二十五日夜夢二弟抱其幼子款款談家事不休覺而志哀

憶汝頻年恨未平、楚天雙眼淚如傾。丸中自是成今古、夢裏那知有死生。家計尚餘兒女態、寒暄猶復弟兄情。覺來撫枕渾無賴、惆悵翻令百感并。

李大府邀飲岳陽樓偕吳郡丞

城頭百尺神仙樓、湖上一點君山邱。逃虛客來攬此勝、吹簫人去吟何秋、三湘蒼蔚杜若老、九馬躑躅魚龍愁。憑君有酒且盡醉、莫使心與身爲讎。

玉林集

梁繼善

先生字子才、鄉籍桂林、明萬曆戊午、公元一六一八年舉人。官歷石屏知州、著有易韻易摩集、南枝南還集、西舟筆興集、玉林集。事略見咸豐縣志、詩見溫汝能纂輯之粵東詩海

作客已堪憐、春光復眼前。隴頭浮白浪、隄上散榆錢。旅況鶻聲出、鄉心馬首懸。蒼林如可渡、吾欲問歸船。

過沛上

京國馳驅道、悠悠客子情。大風吹四野、王氣隱孤城。舍遠雲偏白、藜深日礙明。徘徊策羸馬、愁逐畏途生。

采石磯

寂寂江南采石磯、憑高一望思依依。潮回捉月人何去、煙冷凌風客不歸。帆掛天門看縹渺、樹迷京口故霏微。閒情莫向空亭問。妬殺蛾眉幾夕暉。

綺園蕉筒集

梁佑達

先生字佑新、別號紀石子、鄉籍泮涌、明崇正己卯、即（崇禎十二年）公元一六三九年舉人、性嗜古文、尤精史學、嘗綜其異同、別其流派、纂爲史眉。明亡、棄儒冠服、禮佛爲僧、著有綺園蕉筒集。事略見咸豐縣志、詩章見溫汝能纂輯之粵東詩海卷四十九。

思歸引

仗劍萬里遊、崎嶇窘高步。中懷多不平、于焉思返顧。獻策會無成、不如守墳墓。折劍鑄爲鏡、鑑余襟與素。引鏡比張良、狀貌同好婦。

木棉花歌

長虹漠漠淡黃昏、絳節雲中擁萬神。霞表初建城頭上、甲光向日開金鱗。光搖夾岸迷顏色、大樹將軍誰者識。一望平原若火燎、疑是田單破燕日。

采蓮曲

託根同佳藕、何須媼並粧。生憎子結後、強半見空房。



狂仙遺草

梁可瀾

先生字元叔、鄉籍待考。博學工詩、時當晚明、隱居羅浮、慕道人葛稚川修煉故事、因自號三十二峰太狂長嘯仙、著有狂仙遺草、卒年八十、顏色如生。見羅浮山志、詩章見溫汝能纂輯之粵東詩海卷五十一。

懷舍姪天亮

竹林諸子曰徜徉、別後何人對爾狂。報國芙蓉藏寶匣、登山瑤草滿詩囊。四君門下無高士、五柳窗前有上皇。文事更能兼武備、中原誰薦杜當陽。

夜泊西灣

野水泠泠浸碧天、西灣深處泊漁船。千山月色孤篷外、半夜潮聲一枕邊。春夢覺來傷往事、鄉心老去憶行年。白頭不是忘歸客、獨對蘆花思悄然。

飛仙吟草

梁夢陽

先生字永雅、可瀾之子。晚明諸生、工書畫、不問仕途、多與高逸士人遊、饒乃父之風、嘗與番禺黎美周等重開訶林淨社、著有飛仙吟草、年三十卒。見粵東詩海卷五十五。

七夕

瑟瑟西風起、柴門寂掩關、月華涼似水、河漢在人間。

未央存稿

梁朝鐘

先生字未央、鄉籍待考、明崇禎己卯舉人、殉節死。事略與詩見長洲沈德潛選之明詩別裁將出皖留別楊六符沈乃功唐聖俞徐譽星

船傍垂楊別緒生、煙含春樹雁歸聲。群公縞帶遺吳錦、幕府青絲唱渭城。幾樹烏啼趨夏口、何時馬首望西京。江南江北如相憶、千里高樓待月明。

碧灘釣叟詩

黃士俊

公字亮垣、號玉崙、晚號碧灘釣叟、鄉籍甘竹。曾祖斌、教書鄰縣、某歲撤帳歸、途中遇有因失金而投水者、曾盡脩脯與以救之。祖廷璣、性孝悌、家財多讓其兄廷瑾廷珣、出則和善待人、橫逆不校、爲師鄉里、人稱祭酒、閒暇吟詠、因有淑里集傳世。父建周、博學能文、不求聞達而篤於樂善施與、築石圍、防水患、尤爲當世之人德之、乃享百齡而卒、獲祀鄉賢祠。士俊生七歲、能文詞、讀書鵝山綠竹亭、多異徵。明萬曆三十一年癸卯舉鄉試、萬曆三十五丁未、公元一六零七年、登進士廷對第一、狀元及第。授翰林院編修、官歷太子洗馬、禮部右侍郎、吏部右侍郎、禮部尚書掌詹事、玉版館總裁、光前垂後、卒年八十有五。子三人、曰昌禎昌祺昌禧。昌禎舉崇禎九年丙子鄉試、授左軍都督府都司、歷禮部主客主事、冊封加太常卿。昌祺、以蔭官工部虞衡主事、督造軍器盡瘁卒、贈光祿寺卿。昌禧早卒。列傳見咸豐縣志、詩章見南海余少颿編纂之廣東歷代詩鈔一首、番禺汪宗衍撰之廣東書畫徵獻錄一首。

禺山精舍在清遠峽山寺錄自清遠縣志

山齋爽氣入空浮、卻倚飛來峰名最上頭。卷幔坐看青嶂合、杖藜晴對白雲流。興來作賦霞偏晚、臥聽流泉思更幽。祇恐燕臺須駿急、龍媒那得久淹留。

爲弟隆垣書存問恭紀詩軸

四朝供事衷餘赤、兩載偷閒鬢亦霜。明主下存心膺舊、老臣追愧股肱良。丕宣聖澤綏鴻雁、坐暢神謨靖犬羊。干羽兩階敷格遠、翻瞻舜日數南陽。

影木軒集

黃儒炳

公字士明、一字焯星、鄉籍龍江、明萬曆甲辰、公元一六零四年進士、授編修。歷任主試



江西、應天。官歷右中允、南祭酒、吏部左侍郎攝尚書事。以母病告歸、親侍湯藥、及母棄養、公亦以哀傷成疾、旋而永別、卒年僅五十有八、傳說公卒前數日、有星隕於邑城之南塔畔云。入祀鄉賢祠、遺著有影木軒文集、詩集。讀書漫錄。子圖贊、字日性、府學廩生、以恩蔭入仕、任內轉餉雲中有功、陞戶部四川司郎中、卒於官。傳略見咸豐縣志、詩章見溫汝能纂輯之粵東詩海卷四十三。

南郊陪祀有述

雲簇千官護曲臺、銅龍銀漢影昭回。光生絳蠟分霄雪、律轉青旻度管灰。鼈禁齋居嚴陟降、瑤壇禮洽慶趨陪。報成欲獻甘泉賦、揆藻慚非漢世才。

上苑聽新鶯

東風輕拂禁城西、二月黃鸝羽正齊。靜聽嬌歌流玉樹、虛擬仙吹繞金隄。間關巧度千門曉、斷續遙看盡日啼。知是上林迴淑氣、春聲如隔碧雲低。

金陵渡江即事

金風吹日落平波、三五征帆陣陣過。鷓浪水雲青舫遠、烏啼楊柳白門多。孤燈隔岸侵漁火、清角寒江雜戍歌。對此天涯腸欲斷、不堪歸路日蹉跎。

題盧元明白雲樓

高閣面山城、逶迤漢峙平。片雲千古色、一望九秋輕。瑞葉飄初定、仙衣綴欲成。知君幽賞足、持贈若爲情。

道中梨花

驛路梨花發、叢叢盛莫當。輕車斜度影、疎幌暗浮香。標格依梅綻、芳菲鬥雪粧。探春頻借汝、底事馬蹄忙。

敦仁堂稿

黃維貴

公字周士、又字懷龍、鄉籍龍山沙富、明萬歷壬午、公元一五八二年舉人、官歷浙江樂清縣知縣、遺著敦仁堂稿傳世、事略見咸豐縣志、詩章見乙亥溫肅輯錄之龍山詩錄卷上。

杭州鄧明府德咸偕遊紫金山

山勢盤盤衛紫宸、遙從巒極挹高真。光騰寶杖金宮闕、氣結龍文鳥篆新、珠樹三花棲白鶴、雲車五色駕蒼麟、仙都自覺乾坤別、回首人間總幻塵。

千尋丹壑鬥嶙峋、福地初開廣勝因、金粟自依雙樹影、白蓮長奉一燈輪。僧留恰共青精飯、客到翻銷紫陌塵。易說空門應不碍、何時舍筏渡迷津。

縹緲誰開第一梯、諸峰晴色坐來低。龍池不散金銀氣、鼇極潛通日月蹊。大壑風生千疊振、星河水下萬行齊。虛疑上界無人到、此日飄飄馭紫霓。

丹邱豈亦避秦餘、誰向花源此卜居。樓閣畫局雲自護、松苓春長日堪鋤、閒來共醉山中酒、深處應藏內景書。自笑悠悠空歲月、軒轅猶欲待公車。

萬疊峰巒紫翠中、團飄幽勝在岩東、龍盤險絕渾無路、鳥道斜穿隱別宮。陰洞溜飛長作雨、欹崖松掛半垂虹。憑君共愜躋攀興、別後雲煙何處逢。

登雞鳴寺塔

祇臺開翠岫、花塔聳穹巒。曲徑盤龍上、飛甍過鳥前。鍾離東嶂合、太液後池穿。樹點人家小、空晴鳳闕懸。蒼茫平楚日、澹蕩百門煙。爽籟流清梵、慈雲藹法筵。犬雞聞轉近、寒鴿怖猶旋。亂雨曇花散、何年卓錫還。

登滕王閣時期兒隨北上

滕王高閣幾登臨、南浦西山自古今、最愛天邊雙白鶴、數聲鳴和五雲深。



春暉堂稿

黃聖期

公名希睿、字逢一、號濟石、鄉籍龍山沙富、維貴長子、幼承庭訓、明萬歷癸卯舉人、庚戌、公元一六一零年進士、官歷戶部郎中、力能清慎自守、丕顯家風、惜天不永年、春秋僅三十六而卒、遺著有春暉堂稿。事略見咸豐縣志、詩章見乙亥溫肅輯錄之龍山詩錄卷上

舟行即事

放舟出遠浦、日色午仍昏。風起溪溪葉、雲遮岸岸村。江魚翻浪出、汀鳥逐沙喧。旅泊知何定、飄飄任海門。

七星巖

何年驅石貯仙家、曲徑嶢然鳥道斜。玉乳低懸迷日月、碧蘿高掛積煙霞。明河盪去星堪摘、孤掌擎看柱欲斜。到日瑤臺秋正好、可誰同馭五雲車。

嚴陵釣臺

日暮江寒隱富春、客星曾此渥清塵。一竿把釣仍堪老、五月披裘未厭貧。素業自應留水石、高名終擬傲麒麟。桐江繫鼎絲千尺、豈爲狂奴洽隱淪。

寄韓緒仲李伯襄二太史

嶺雲煙雪不同時、別後封書杳莫期。穗石天晴花送煖、御河冰泮玉流澌。冥冥旅雁飛沙急、啞啞棲鳥繞樹遲。知爾苑中聯句好、早鶯啼處使人思。

秋懷

朝來爽氣滿檀欒、坐對西山柱笏看。玉井遠含諸壑靜、碧雲晴鎖半峰寒。殿前古柏團蒼蓋、湖上仙舟隱翠翰。遙憶宸遊當此地、百靈趨走護金鑾。

天府元稱百二重、圖陵北望枕居庸。可堪塞嶺時宵獵、幾處邊城起夕烽。馬市頻年虛議款、

虞王當日漫談封。四郊自此方多壘、三輔何時竟樂農。  
芝房桂閣對粧樓、碧沼芙蓉引御溝。輦道乍臨仙珮迥、鑪煙細駐畫簾秋。晨鴉每帶昭陽色、夕兔長添永巷愁。聞道深居饒上理、懸知宵旰獨先憂。

### 薛葢齋詩集

黃聖年

公字逢永、號石傭、又號大藥山人。鄉籍龍山沙富、維貴次子、聖期之弟、棠棣競秀。明萬曆戊午、公元一六一八舉人、官歷湖廣當陽教諭、工書法、學務博宏、爲文下筆立就、以足病告歸、壽六十二。遺著有墻東草、薛葢齋詩集、非有堂草、壬遊草等。事略見咸豐縣志、詩章見公元一九三五年乙亥溫肅輯錄之龍山詩錄卷上。

### 河上新柳家大人命題

陽回江上百花明、柳色先看弄曉晴。拂岸柔條堪繫舸、傍簷纖葉待巢鶯。煙籠舞影當杯淺、雪擬花飛點席輕。自是柴桑歸去早、春風門巷倍關情。

### 賦得秋閨月和家兄

長空一片月、飛向畫樓前。影共寒衣薄、愁將破鏡懸。淒清看枕簟、明白夢關邊。莫是征夫苦、秋風急上弦。

### 答子明人日作

幾度貴陽雨、都沾紫陌塵。最憐春作客、空惜日爲人。漂泊曾誰問、鶯花只自親。今朝落梅處、定有翠眉顰。

### 芙蓉歌

喚儂玉芙蓉、愛儂面相似。誰知山上峰、亦與儂同字。山上芙蓉空嵯峨、水上芙蓉秋露多、面上芙蓉當若何。



應洲詩草

黃在裘

先生字應洲、鄉籍龍江、明嘉靖乙卯、公元一五五五年舉人。國子監博士、官歷同知。事略見咸豐縣志選舉表。詩章見溫汝能纂輯之粵東詩海卷二十九。

西樵山

樵山迤邐宛飛龍、形勝曾誇七十峰。絕壁流雲開罨畫、平林過雨散芙蓉。山前瀑噴千岳玉、杖底風迴萬壑鐘。夙昔向平耽雅尚、幾時舒笑倚長松。

仙石洞稿

黃朝賓

先生字伯遷、一字少嘉、鄉籍陳村、明萬曆丙子、公元一五七六年舉人、官歷福建長泰縣教諭、著有仙石洞稿、事略見咸豐縣志、詩見溫汝能纂輯之粵東詩海卷三十七。

送陳山人讀書羅浮

四百峰高日月迴、橐書從此謝氛埃。遙分木客藤蘿幔、更上麻姑錦繡臺。石臼曉春紅翠響、玉笙宵奏鳳凰來。澄心靜夜丹光裏、七十璇房次第開。

雙溝曉行

聽雞騎馬出雙溝、白草荒原綠未抽、吹面北風寒獵獵、不知春在帝王州。

北征草易軒集

黃公儀

先生字元禮、鄉籍陳村、明萬曆己酉、公元一六零九年舉人、官歷湖廣武昌府同知、生平端方正直有君子之風。著有北征草易軒集等、年八十二卒。事略詩章見粵東詩海卷四十四

初至蒼梧有作

南紀遨遊興不孤、扁舟今始過蒼梧。峽中赤水還朝夕、洞裏丹砂問有無。百雉河山成錦繡、千帆樵酤奉征輸。郵亭未可逢關吏、漫學終軍浪棄繻。

抱真集

李孔脩

先生字子長、號抱真子、鄉籍大良、生於明正統元年、公元一四三六年、卒於明嘉靖五年、公元一五二六年。從新會陳獻章白沙先生門下受業、因一時與增城湛若水、同邑梁儲爲硯友、惟淡科名。治易學、善詩畫、詩則不履前人戶牖、且不多作、但嘗得白沙先生許爲是見道之言、此蓋其與學易攸關。畫則出遊山水、歸即圖之、偶畫翎毛、尤擅寫貓、有毛骨如生、鼠見驚走之勢、故其繪製、人恒爭得而寶之、惟不肯率意濫作、以樸淡醇謹過其一生、與妻食必舉案、亦其至樂、因享大年、至九十餘歲而卒。身後得憲使李中、參議王洙經營其喪、復得南海霍文敏先生葬之於西樵山、並志其墓、其文有稱先生爲白沙抗節振世之志、惟子長、張詡、謝佑、能不失其宗云。其不愧爲有明之一代高士也、如此。列傳見咸豐縣志、事略見羊城古鈔李子長先生墓、詩章見鄒崖逋者鈔讀之嶺南詩存、畫作見汪宗衍先生著之廣東書畫徵獻錄及廣州市文物志。詩章又見粵東詩海。

貧居自述

閒居樂事少人知、野老風情自不羈。三徑菊邊元亮酒、百花潭上杜陵詩。未知消長還觀易、不較輸贏懶下棋。拾得堯夫安樂扇、將來懸在小茅茨。

西樵山

奇花不盡留春久、宿雨纔收見月新。閣外凌雲高去鳥、山中問道遠邀人。

送湛甘泉迎侍

大孝古來兒傍母、一官今日母趨兒。八千里路波濤險、飯是胡麻亦可悲。

詠荔枝

封皮釀蜜水晶寒、入口香生露未乾。本與荔枝同一脈、當時何不進長安。



李孔修雄貓圖軸

乙卯年夏月  
李孔修畫  
抱真堂



亦武之音

李德彰

先生鄉籍龍江、業通歧黃、亦習武略、以濟世安民、於明中業獲贈御史之銜。事略詩章、見溫汝能纂輯之粵東詩海卷十五。

槎溪見訪輒惠以詩因倚和之

衡門流水野人家、何事淹流長者車。聆爾舊遊情更洽、懷余新詠調堪誇。自慚供奉無兼味、祇有相看對落花。卻喜清平無一事、不妨回首夕陽斜。

題友人月梅號

梅似貞操月比形、幽人騫舉自冥冥。光搖練影當窗白、冷浸瓊漿入座馨。處士孤山詩興豁、嫦娥蟾闕夢魂惺。知君對此饒佳趣、索笑巡簷幾醉醒。

北山歸叟集

李聰

先生字士達、鄉籍龍江、德彰之子。明成化丙戌、公元一四六六年進士、官歷南京江西道監察御史、廣西參政。以廉名世、晚年居家、耄出無輿、暑無蓋、卒年八十四、入祀鄉賢祠。遺著有北山歸叟集傳世。事略見咸豐縣志、詩章見溫汝能纂輯之粵東詩海卷十六。

寄潛山學博弟慧

鴻雁分飛忽十年、夢回池草益淒然。蕨薇春好先投紱、苜蓿秋深尚擁氈。望重定啣楊震雀、才雄期著祖生鞭。沽錢莫問今多少、永夜相思各一天。

次洗政

憐君積學究三餘、壯歲名高上帝居。司馬豪華推獨步、賈生才調更誰如。浮雲出岫心何在、倦鳥歸巢志不虛。從此釣臺高臥隱、丈夫何事嘆無魚。

遊七星巖和李使君



郭外幾青山、怪石嶙峋結、中有七星巖、內蘊光明穴。山高勢嵯峨、巖深洞幽絕。石髓滴千秋、恍惚懸素纈。我欲登虬龍、峻坂回九節。我欲訪層巖、仙蹤不易躡。徘徊意難忘、感歎成虛說。賢哉李使君、不我疎遠絕。拉心同遨遊、觸目舒心悅。轉盼巖谷間、分明天地設。題詩紀勝遊、陽春飛白雪。撫景憶包公、貞心耿忠烈。一硯且不持、愛民恒切切。清聲聳後塵、美政光前哲。吾儕亦何人、豈無名與節。巖下往還來、真心誰似鐵。

贈陽溪梁孝廉尊人

流水柴門半不關、個中真景貯壺山。雨晴鷗鷺浮沉見、日落漁樵遠近還。幾度琴尊風月下、數聲雞犬竹籬間。先生獨得邱園趣、不羨飛黃出帝關。

樵懷集

李際明

先生字伯章、鄉籍陳村、明崇正庚辰（崇禎十三年）公元一六四零年進士。官歷建德縣知縣、居官清正、杜絕苞苴（貨賄）贖鍰（罰款）悉歸公庫、庭閒之餘、著有樵懷集傳世。事略見咸豐縣志、詩章見溫汝能纂輯之粵東詩海卷四十九。

同聲歌

君住首山巔、我住商山下。中間相去萬千里、清風吹來無冬夏。山巔不須學飯牛、山下不須學牧馬。君操上古無絃琴、我敲深竹墻頭瓦。持與問君同不同、勿言知音和者寡。

幽居吟草

李萬齡

先生字永年、鄉籍待考、明代布衣、詩一章見溫汝能纂輯之粵東詩海卷五十一。

幽居

養性惟宜拙、山中一草堂。風來門自動、月到院生光。徑僻青苔滑、窗虛綠樹藏。淡然無一物、高臥對羲皇。

先生字文瑞、鄉籍龍江、明景泰四年癸酉、公元一四五三年舉人、翌年甲戌登進士。官歷御史巡按、福建僉事。居恒工吟詠、喜著述、卒祀鄉賢、遺著有雅音會編十二卷、列傳見咸豐縣志、詩章見鄒崖逋者（何翹高）鈔讀之嶺南詩存。又見溫汝能纂輯之粵東詩海。

中秋有感

客裏逢佳節、飄蓬愧此身。可憐今夜月、獨照異鄉人。物色隨秋改、羈懷逐日新、何時優詔許、歸養白頭親。

閒居和杜子美韻

問徑隨春草、支筇入午雲。歸來陶靖節、多病沈休文。花氣單衣稱、松陰小簟分、悠悠天地別、白日絕塵紛。

除夜有感

旅館蕭條歲事闌、獨憑杯酒強爲歡。家園親舍三年別、客路梅花幾度看。春意又從今夕暖、宦情猶似舊時寒。催人光景如流水、莫遣秋霜點鬢端。

一溪詩存

黎億

先生字汝賢、號一溪、鄉籍鷺洲。明成化年間舉人、官歷監利縣知縣。與成化元年乙酉舉人黎暹、是同鄉同族、是黎氏宗族一時並起之俊彥。事略見咸豐縣志選舉表、詩章見鄒崖逋者鈔讀之嶺南詩存。又見溫汝能纂輯之粵東詩海補遺卷一。

張山人過宿村齋

君自山中出、樵峰第幾層、苔生雙蠟屐、雪掛一枝藤。短榻留春月、殘書繙夜燈。誰言人境裏、坐見岳廬僧。



重過英州

奇石削天碧、長江照日清。九秋歸故國、一棹過孤城。峰際人煙出、波間塔影橫。雲華迴首望、空有野陰平。

偶然

讀罷楞嚴獨悄然、悔教才思負芳年。人當事過方知幻、悟到心空未是禪。見佛豈應留半偈、焚香原不禮諸天。近來得力知何似、惟向松窗白晝眠。

歲晚村居

風塵莫論事紛紛、寂寞孤村有暮雲。不向馬卿貧貰酒、可堪王粲別從軍。江湖漸次消鯨氣、雨雪參差落雁群。詩律當思工晚節、君苗有硯未應焚。

張山人烹茶夜話

良晤試新茗、清齋共小蔬。涉園當雨後、入箸及春初。寒榻松濤遠、空階竹影餘。蕨薇隨處有、誰信碧山虛。

題壁詩

黎宏業

先生字孟擴、鄉籍馬滘、明天啓辛酉、公元一六二一年舉人。授和州知府、和州素饒裕、士習奢華、宏業抵任數月、剔蠹抉幽、加意整飾、使民知向學、百廢具舉、惟明末綱紀失常、時遭張獻忠、李自成之亂。和州當吳楚水陸要衝、寇至之日、宏業率衆防衛、力戰而敗、民多奔散、宏業母以大義所在、先自縊、妻子隨之。宏業立題詩二十字壁上、上馬陷陣而死。以忠節留芳、祀名宦祠。列傳見咸豐縣志、詩章見溫汝能纂輯之粵東詩海。

題壁詩

爲官不負民、爲臣不負君、忠孝誠已盡、生死安足論。

抑菴集

黎天啓

先生字允聰、號抑菴、鄉籍鷺洲。明嘉靖癸卯、公元一五四三年舉人。官歷南寧知府、事略見咸豐縣志選舉表、詩章見溫汝能纂輯之粵東詩海卷二十六。

村行

初離青荔浦、即到綠蘋濱。緩屐隨群鳥、閒亭得主人。松陰抽野菜、竹葉膾江鱗。風俗猶餘古、雲中擬結鄰。

於村路尋得江岸幽處

石繞村坳一徑斜、又沿芳草出江涯。煙生積水欲爲雨、風到閒枝亦作花。僧帶野雲歸古寺、鳥啣山翠落人家。川源有路皆仙隱、好向漁翁買釣槎。

草堂集

黎紹詵

先生鄉籍鷺洲、明嘉靖甲子、公元一五六四年舉人、官歷河東鹽運使、見粵東詩海卷卅二  
曉行

閒窗乘曉望、四野靜無霞。一葉隨流水、千枝滴露花、雞聲聞遠岸、人語是誰家。爲報趨程者、孳孳路莫賒。

夏日次答韋純顯草堂小集

結屋田間古徑西、洞天深虎難還迷。三春澗草堪娛鹿、五夜篝燈解聽雞。投轄敢云河朔飲、登壇重見浣花溪。不妨暇日頻臨眺、剩有青錢掛杖藜。

集純顯宅

細雨黃花白雁秋、餐英此日共淹留。江村比屋西成樂、穗石青樽薄暮酬。蒼翠滿庭生意動、牛羊下隴野情幽。何當長嘯雲羅外、一臥滄浪問釣舟。



羅陽集

潘梅

先生字元夫、鄉籍沖鶴。明嘉靖戊子、公元一五二八年舉人。官歷南京戶部郎中、歸隱羅浮、自號羅陽。篤愛季弟潘杞、杞早歿、乃撫其孤光統遣從宿學黃泰泉遊、得以成才。事略見咸豐縣志、詩章見溫汝能纂輯之粵東詩海卷二十一。

省墓

頻年遙作吏、竟日倍思親。梓里雲根塚、松門夢裏人。乞歸瞻馬鬣、引步陟龍鱗。風木皋魚恨、於今更愴神。

薊門春曉

萬里鳴騶入帝京、春風駘蕩曙雲平。祥光隱隱金爲闕、佳氣蔥蔥玉作城。南海日浮龍舸遠、西山天敞佛燈明。惟餘湛露深汪濊、嫩柳新蒲太有情。

滋蘭集

潘光統

先生字少承、鄉籍沖鶴、乃潘梅之姪、明代廩貢、授光祿寺署丞、官歷京府通判。著有滋蘭集、事略詩章俱見溫汝能纂輯之粵東詩海卷三十五。

同楊祠部懋功遊摩訶菴

紅塵十萬入招提、花木陰陰可杖藜。三徑風煙人世外、五陵秋色帝城西。青山欲共深公買、翠竹多逢阮籍迷。一臥雲房心便息、更從何處覓丹梯。

登樓望海上戰艦

旌旗海上颭寒煙、南北傷心有歲年。莫道少陵多涕淚、鼓鼙今日是秦川。

小除夕郭樂周小酌舟中

簌簌寒風霜滿林、數株疎柳暮煙沉。黃河日夜波聲急、可似思鄉一片心。

公字朝綱、鄉籍白藤、明正德庚辰、公元一五二零年進士。官歷刑科給事中、不避權要、以事見忌、遷漳浦縣丞、甌寧令、卒於官。事略見咸豐縣志、詩章見粵東詩海卷二十一。

讀文山遺事

魯連天下事、誓不作秦民。至死猶憂國、臨危豈顧身。目中無宋土、樓下有胡塵。夢裏朝天去、徘徊散紫宸。

篋中集

余玉馨

夫人鄉籍白藤、余經之女、幼嫻母訓、長適夫許炯、不第、嘗流寓金陵、玉馨時侍筆硯、唱隨爲樂、時人稱其饒梁孟之風、遺著有篋中集。見咸豐縣志、詩見粵東詩海卷九十六。

憂夜

微月近前庭、風涼玉露零。香眠花裏蝶、星墜柳梢螢。玉漏頻傳箭、銀河若建瓴。徘徊不成寐、起傍小池行。

秋日即事

水漲千江雨、林紅一夜霜。秋深鷹力健、風急雁聲長。金井餘陰薄、銀缸滴露涼。飄零白羽扇、猶帶舊時香。

次韻陳雲仙表姊寄懷原韻首韻乃先君諱也謹更一韻奉答

憶昔分攜在玉京、至今羅袖有餘馨。才如池草爭春綠、人似梅花帶雪清。違別十年天共遠、相思千里月同明。夭桃一樹臨春發、猶向枝頭想舊形。

圍棋即事呈夫君

重圍或是興王地、一子能當生死關。到得功成無著處、機心用盡不如閒。



彈琴

閒來獨自鼓焦琴、夜靜焚香是賞音。萬里家鄉隨地遠、七絃嘹唳對天吟。清風明月襟懷潤、流水高山怨恨深。彈到落梅誰會得、樓敲鐘鼓坐花陰。

綠野堂集

吳譽聞

先生字紫樓、鄉籍黎村、明嘉靖戊午、公元一五五八年舉人。官歷許州學正、陞邵武府推官、思恩府同知、著有綠野堂集。事略見咸豐縣志、詩章見溫汝能纂輯之粵東詩海卷廿九春日居九樓懷仁和梁明府

春風和鳥坐相求、倚聽聲聲重客愁。削壁飛花聊進酒、亂山疎雨對登樓。黔天不到雲中雁、湖海難逢雪後舟。應笑故人酬世拙、一官寥落自邊州。

初入鎮郡

鎮郡開黔戶、羅施迹尚留。山原猶北折、河水自東流。猿作殊方語、鶯爲絕國愁。攀崖凌鳥道、沿谷瞰龍湫。彌月晴陽少、經時毒霧稠。雞聲出曉寨、螢火入邊秋。仗劍星隨馬、當歌雪滿樓。暗蓬驚散地、飛夢杳浮邱。白髮遊堪遠、丹心愧未酬。艱危身萬里、曾不爲封侯。

留餘集

林志孟

先生字淑之、一字韋銘、鄉籍古朗、生八歲、便能文、髫齡即舉明萬曆己卯、公元一五七九年舉人。癸未會試乙榜、授進賢教諭、歷任荔波、昭平、建德知縣、政令寬猛得宜、訟刑清簡、陞戶部貴州司主事。去官日士庶攀轅百里相送、卒祀名宦祠、著有留餘集疏議。列傳見咸豐縣志、詩一章見溫汝能纂輯之粵東詩海卷三十八。

九龍洞

逶迤九節九芙蓉、萬壑濤生百尺松。遊客漫攜山竹杖、恐驚風雨又爲龍。

虞部集

歐大任

先生字楨伯、號崙山、鄉籍陳村。父世元、家蓄四部、世稱沙洲先生。大任於文藝經濟律呂之學、精研有得、明嘉靖癸亥、公元一五六三年、以歲貢廷試列首。官歷國子監助教、南京工部屯田主事、年八十卒於鄉、終其身無妾媵、不問家人生產、乃有嶺南端人之譽及與梁有譽、黎民表、李時行、吳旦、並稱爲南園後五子。傳世有百越先賢志、平陽家乘、廣陵十先生傳、思元堂集、旅燕集、軺中集、浮淮集、游梁集、南翥集及虞部文集等。事略載羊城古鈔、詩章見鄒崖逋者（何翹高）鈔讀之嶺南詩存及松江陳子龍撰之皇明詩選。

謁文信國祠

憶昔南冠日、厓山恨未忘。魂沈柴市月、淚盡薊門霜。白雁銜江草、黃龍逐海航。中原冠劍在、歌舞待巫陽。

夜登太白樓

狂歌采石月、高臥謫仙樓。珠斗當窗見、銀河拂檻流。朔鴻飄塞色、羌笛入邊愁。何處思公子、峨眉夜色秋。

晚霽過梅關

千峰收積雨、迢遞出梅關。日向猿聲落、人從鳥道還。中原開障塞、南海控甌蠻。萬國來王會、秋風戰馬間。

除夕九江官舍

餞歲潯陽館、羈懷強笑懽。燭銷深夜酒、菜簇異鄉盤。淚每思親墮、書頻寄弟看。家人計程遠、應已夢長安。

九月十五夜月

順德詩徵



瑤草三秋色、金風一夕寒。書緣多難絕、月在異鄉看。悽斷驚霜角、遲徊望玉盤。刀頭今未定、誰最憶長安。

夜坐寄友

坐久北風起、江聲帶遠沙。客愁初到鬢、鄉夢不離家。林靜無殘葉、燈寒有落花。懷君滯羈旅、雲海各天涯。

怨歌行

高臺風蕭蕭、下澤波湛湛。春草綠已萎、遊子歲月深。駕言御松舟、寫我繁憂襟。昔來睢鳩鳴、今已蟋蟀吟。遨遊將安歸、弭櫂迴塘陰。代馬嘶隴首、塞鴻翔漢南。我欲往從之、江水思難任。佇立睇川塗、一寄瑤華音。行行采蘭苕、聊以紓我心。

劉王郊臺

五季亂豺虎、曆數未有歸。南漢驕自主、帝粵保南陲。白龍表上瑞、園邱祀蒼祇。乾亨首紀元、升壇列金枝。薦德羞幣玉、滌牲瀆郊犧。上常肯居歆、祝史虛陳辭。君昏社已屋、廢臺委山陂。燔柴不復登、茂草鞠荒基。魯侯昔潛禮、已歎周公衰。甘泉與雍時、秦漢多陋儀。矧茲蛟蜃國、禾黍奚足悲。

登宣武城樓

百二山河控上游、鬱蔥佳氣滿皇洲。風驅大漠浮雲出、天轉滹沱落日流。雙闕金莖連北極、萬家紅樹動高秋。茱萸黃菊還堪佩、獨上城南百尺樓。

題鐵泉精舍

巖前舊是子雲家、門掩飛泉一道斜。石室竟藏高士傳、山園猶種故侯瓜。虎看丹竈多年火、樹掛詩瓢幾代花。小草尚慚曾出洞、至今猿鳥悵煙霞。

經李山人子長墓

宰木蕭蕭不可聞、青山宿草最憐君、鄉人已祭先生社、弟子曾營處士墳。終古黔婁空有諡、百年封禪竟無文。束書身後嗟零落、惟見哀猿叫白雲。

朱仙鎮岳王廟

百萬長驅虜不支、金牌誰遣哭班師。英雄未飲匈奴血、天地空摧馬革屍。二帝夢魂沈朔漠、兩河父老望旌旗。西風折盡沙城柳、猶似將軍督戰時。

三河水

三河水、萬軍淚。淚滴三河水不流、胡笳吹落薊門秋。河水流不住、胡笳過何處。誰使兩年來、移營兩屯戍。君不見胡騎已馳牆子關、漢軍尚哨熊兒峪。日本侵韓明師援之敗於三河

送司封黎郎中惟和出參廣西政

鳳城芳草散鳴珂、橫笛誰堪馬上歌。荆楚曉煙飛越嶺、湘灘秋色入牂牁。省郎劍佩雲霄遠、詞客江潭岳牧多。玉節明年應趣召、咸陽西上莫蹉跎。

瑒玉齋集

歐必元

先生字子建、鄉籍陳村、大任從孫。學淹博、年十五爲諸生、試輒第一、以時事多艱、嘗上書巡撫條陳急務、惜不能用、命又遲滯、乃年六十始登歲薦、與修府縣志乘、得縉紳稱之曰嶺南端士。閒遊山水之間、興到千言立就、著有勾漏草、羅浮草、溪上草、瑒玉齋集等、列傳見咸豐縣志、詩章見鄒崖逋者鈔讀之嶺南詩存。

寄訊方伯山陰王公

思君回首望中原、三徑歸來道更尊。銅柱勳名憐薏苡、鏡湖煙月避桃源。千秋莫問波臣淚、一劍誰非國士恩。見說右軍重誓墓、甘棠雖在不堪論。



醉吟草

歐主遇

先生字嘉可、號壺公、鄉籍陳村。博學篤孝友、惜以命運、十赴秋闈不第、至清康熙廿六年始中副榜。一時縉紳多屬以文、客來問字屢滿門戶。與陳子壯、黎遂球、黃逢永、僧智海、僧通岸、黎邦城、區懷瑞、區叔永、黃季恒、陳喬生、梁佑達等修復南園詩社、世號南園十二子。遺著有西遊集、北遊集、醉吟草、自耕篇等。列傳見咸豐縣志、詩章見鄒崖逋者鈔讀之嶺南詩存。又見溫汝能纂輯之粵東詩海卷五十一。

贈安義陳明府

宿雨過山城、山春花鳥迎。榻開官署冷、琴撫訟堂清。勝地鄰陶令、遊人託馬卿。相逢憐別路、惆悵故交情。

永曆二年九月十五日

東西巡駐蹕、南北直收京。盛氣靈洲見、秋花錦石明。因風荷芰客、望月鳳凰城。誰悟升沈理、平分天際情。

不寐

悲歌憂社稷、永夜思悠哉。虎豹關誰守。龍影兆不來。幾人沈屈水、何處鑿顏坏。暫借臥遊得、翻忘鄰笛哀。

得黃女倩陽春書卻寄

戎馬滿天地、離居日月憂。清談思衛樂、曲徑少羊求。雁字懷難寄、鵠原恨故留。江村重就宿、典籍任冥搜。

灘上口號

誰解西行一段愁、掉頭歸去正逢秋。月輪初上灘聲急、流盡清光送客舟。

最樂集

歐芬

先生字嘉祝、鄉籍陳村、明崇禎己卯、公元一六三九年舉人。嘗與同鄉舉人黃公儀共理鄉事、清內禦外、經畫周至、曾遇年荒、餓死者相繼、得其二人步行勸賑、存活甚衆、事略見咸豐縣志、詩章見溫汝能纂輯之粵東詩海卷四十九。

過富陽憶何明府

布帆凌曉發錢塘、趁得嚴風到富陽。山勢逶迤將入漢、江流曲折始通杭。難忘問字揚雄宅、尚憶鳴琴單父堂。半枕夢魂猶不定、淚痕零落鬢絲旁。

送壺公兄之循州

垂楊芳草競菁蔥、溪閣離樽日照紅。人向侯嬴虛左席、客從鮑靚挹仙風。乘潮悵望隨飛鷁、訪勝如何託畫熊。翹首層巒三百六、相思多在鐵橋東。

輓黃象坤

客星一夜失江津、無復溪頭理釣綸。抱壁向慚頻獻楚、尋源今似永逃秦。丹青業在堪垂世、白玉樓成易促人。社裏姻盟皆可戀、未聽鄰笛已沾巾。

滄浪洞集

區龍正

公字象先、鄉籍西潯、明萬曆庚戌、公元一六一零年進士。初授漳浦縣令、歷官至滇南道台、持守清正、所至有廉能聲、居官三十載、田廬不及中人產。卒年八十有四、著有遼陽全書、滄浪洞集、並祀鄉賢忠孝祠。列傳見咸豐縣志、詩章見溫汝能纂輯之粵東詩海。

曹署感事

中丞累詔援榆關、節鉞長隨塞外頒。南國十年輸稅盡、北庭連日羽書間。荒城笳落秦時月、絕島屯高海上山。自有朔風鈴鐸響、幾將封事過朝班。



翼翁吟草

鄭翼

先生字永時、鄉籍桂林、明天順己卯、公元一四五九年舉人、官歷瑞金縣知縣、事略見咸豐縣志、詩章見溫汝能纂輯之粵東詩海卷十六。

他鄉九日

江浦秋深木葉飛、湖天霜冷雁聲微。他鄉黃菊愁中對、故國青山夢裏歸。葵悃行當傾曉日、草心還未報春暉。十年佳節征途遇、那得籬東候白衣。

叔翁吟草

鄭應文

先生字叔年、鄉籍林頭、明宏治乙卯、公元一四九五年舉人、官歷宣平縣知縣、事略見咸豐縣志、詩章見溫汝能纂輯之粵東詩海卷十七。

題陶淵明歸莊圖

懶居彭澤憶柴桑、解組寧因俗吏忙。莊上豪吟招惠遠、窗前高枕臥羲皇。五株翠柳春容媚、三徑黃花晚節香。一代風流更誰似、至今人說晉賢良。

淵翁吟草

鄭用淵

先生鄉籍桂林、明嘉靖甲子、公元一五六四年舉人、官歷信豐縣知縣。事略見咸豐縣志選舉表、詩章見溫汝能纂輯之粵東詩海卷三十二。

越王臺

越秀山前百尺臺、尉佗從此闢蒿萊。開疆卻藉任囂力、歸漢還憑陸賈才。雁翅城連青嶂合、虎頭門湧碧波迴。荒基此日惟秋草、不見當年鳳輦來。

虞美人草

憶昔鴻門碎玉杯、八千兵盡楚人哀。可憐一代傾城色、別卻重瞳蓋世才。祇有英魂依弱草、

漫將香骨掩蒿萊。花時猶似丹砂艷、長向東風幾度開。

### 佐翁吟草

鄭佐

先生鄉籍桂林、明嘉靖甲子、公元一五六四年舉人、官歷漳州府通判。事略見咸豐縣志選舉表、詩章見溫汝能纂輯之粵東詩海卷三十二。

### 懷陳士鵠

北望望君君復西、勞勞亭上草萋萋。凌霄鳥道星隨劍、躍馬盤江鐵作蹄。雲雨來時巫峽夢、登臨到處楚騷題。十年回首黔中路、腸斷春風錦翅啼。

### 春宮詞

長門絲柳鎖春晴、黯黯飛花對畫屏。一自香風開繡戶、坐聽團扇起鞭聲。宮衣想見霄雲爛、疏草爭傳海日明。辛苦萬畿惟補袞、佇看垂拱瑞河清。

### 勾漏詠集

鄭學醇

先生字承孟、鄉籍倫敦。明隆慶元年丁卯、公元一五六七年舉人。官歷武緣縣令。詩有唐音、著有勾漏詠史諸集、詳具藝文。弟學忠、爲萬曆十年壬午、公元一五八二年舉人並光門第。列傳見咸豐縣志、詩章見鄒崖逋者鈔讀之嶺南詩存。又見粵東詩海卷三十三。

### 銅雀臺

高臺春欲盡、鳳吹隔花迷。漳水流無盡、西陵日易低。總帷不可見、歌舞半含啼。惟有東風在、年年草自萋。

### 燕中雨夜

敝褐中無緒、淒然寢復興。十年心上事、一夜雨前燈。夢與禁鐘斷、愁於短鉢增。鄉關及萬里、歸信渺無憑。



村獠畫餘

彭竹本

先生字睿瓘、又字公吹、鄉籍龍江。父燿字著卿、明崇禎丙子公元一六三六年舉人、庚辰賜進士、官延川令。時清兵入關、席捲中原、諸王逃亡、桂王朱由榔監國、開府肇慶、改元永歷、公元一六四七年至一六六一年。遣燿到廣州諭令朱聿鏞不可各謀獨立、促其共圖匡復大計、孰料不受忠告、身受先斬來使之害。桂王憐之、追贈大理寺卿、諡忠愍。竹本痛父殉難、明亡後、嘗立父祠於廣州、每經父被害處、輒暗然流涕、遂隱居不出、常寄跡僧寮野屋、謝絕塵事、自號龍江村獠、閒以書畫消遣其無聊歲月、所繪蘭竹木石、純以書法入畫、饒清勁之氣、後世因稱之爲竹本派者、惟流傳不多、詩作更少、此章僅見於南海余少飄編之廣東歷代詩鈔、書畫見順德聯誼總會三十周年紀念特刊內陳荆鴻所輯之先賢文物、列傳見咸豐版縣志。按縣志睿瓘作睿壘、有待考正。

寄魏季子翠微山

聞道桃源可避秦、卜居有地託閒身。爰拋野果欺生客、鹿過溪齋狎熟人。筍爲經冬嘗覆雪、柳因種子得留春。何時共醉山中酒、見月方知明月旬。

石湖集古曲事

晚霞零亂兩初收、露柳風蟬昨夜秋。聞說元規偏愛月、肯容王粲賦登樓。誰言有策堪經世、不擬將心更養愁、何處少年吹玉笛、欲迴天地入孤舟。

附錄其草書唐人小游仙詩句

中山午日酒初醒、卻愛玄都夜景清、

起坐天門吹玉篴、月籠珠樹作秋聲。

彭春霖的竹本派



晚清之際，彭春霖初以  
 此悟昨夜秋風之悲傷  
 明月出空江之寂寞  
 倚竹之清風堪強之不  
 折  
 此之更著其何之少年  
 以玉笛之曲王地入此舟  
 水初石何處古之乎  
 文與初過之印 春霖

中山之日酒初醒  
 高坐之為良日  
 東山得報  
 望里門吟玉色  
 逐月紅蕖  
 珠粉作松十  
 餘年  
 小山仙詞乃志人詩也  
 彭春霖



先賢人物

陳荆鴻輯述

嶺南三忠之陳巖野



陳巖野遺像

當明末清初的時候，在廣東力戰衛國的人士很多，其中有一位，更為後人所稱道的，是陳邦彥、陳子壯、張家玉、號嶺南三忠。

陳邦彥，守會城，世居龍山鄉沙藤埠。直至他的父親韶晉，才遷居邑城大良。邦彥在北門外錦巖山下，設館授徒，學者稱他為巖野先生。文名甚著，先後出其門者逾千人。李自成陷京師，崇禎帝殉國煤山，繼而清兵入關，席捲河北。邦彥正在這動亂的當兒，做了聞變詩十二首，其中兩首云：「漢漢腥風動劍門，鼓聲聲斷日黃昏。殷憂共億宵衣久，遺澤猶聞血詔存。滿目河山留義烈，故宮黎庶逐啼魂。江流不盡敷天恥，薪膽憑將獻至尊。」「二百年來世澤長，謳吟俄已徧炎荒。反裘未許哀鴻雁，飽宿何當畏犬羊。漢時漁竿拚慷慨，江城船介自翱翔。朝廷可是蒼生責，倚劍酣歌笑爾狂。」

先生字會斌、鄉籍龍山。父韶音、徙居縣城北郊錦巖山下講授性命之學。邦彥幼承庭訓、明弘光元年乙酉、公元一六四五年舉人。識見通博、一時文行籍甚、歲授生徒、先後逾千人、世稱錦巖先生。時當明末、京師告陷、崇禎帝殉國煤山、清兵席卷河北之際、邦彥聞變、即投筆從戎、時唐王朱聿鍵退守福州即位、任邦彥爲兵部職方主事、率兵守衛南方各地、轉戰經年、直至與陳子壯合兵反攻廣州失敗、力戰被執、不屈而死。步文信國之氣節千秋、成仁取義。與南海陳子壯、東莞張家玉、並稱嶺南三忠。遺著有雪聲堂集、雪聲堂是先生生前讀書處。列傳見咸豐縣志、詩章見鄒崖逋者鈔讀之嶺南詩存。

發蕪湖別同舟諸子

度嶺愛鄉聲、聯舟況復情。憐君初即次、而我戒孤征。江折西梁險、天迴北極明、未堪離思急、桂酒更同傾。

南上述懷

人生際中晚、譬若萍隨水。禍福非所謀、母令媿青史。仁義本何常、蹈之則君子。謗余生不辰、西北風塵起。謀國彼何人、皇輿倏傾圮。藿食雖無責、良亦有餘恥。所賴宗社靈、真人嗣豐芑。湯湯橫流波、半壁東南峙。撫膺疏往事、血淚欲盈紙。逝將瞻闕廷、何必曾青紫。客曰子何其、鯁生寧足齒。士固各有志、遑問譽與訾。芻蕘如可獻、亂略庶有多。寄言謝同人、但祝道如砥。時先生聞京師陷適與門人講書至見義不爲無勇也章句因而拍案而起

又

薰風起南溟、揚帆指京國。授衣兼暑寒、輕裝任羞澀。親闈旣棄捐、遠逝今亦得。中饋屬久虛、有妾侍巾櫛。兒女各幼稚、大者僅成立。頗亦解大義、不作牽衣泣。但囑早來歸、無爲



戀京邑。我家本單微、筆耕歲自給。非關慕華廡、其如值傾側。亂流如未濟、孤舟逝安適。著書三十篇、字字揮血汁。持此獻彤廷、太倉餘一粒。群策倘輻輳、濟時尚有及。微志苟獲伸、懷哉即家室。

舟發珠江承諸子攜酒餞送次韻賦別

揚舲伐鼓發江干、變徵聲高七月寒。夜度可能知大漠、日邊何處是長安。杯因惜別兼賢聖、策爲憂時雜管韓。燕石自慚仍躍冶、歸來休笑舊儒冠。

次答大參區几蘧先生

不道黃巾俄犯闕、浪傳繻葛亦能軍。中原半已成魚爛、草野寧當戀隼群。燕薊攀髯愁侵孛、秦淮扈蹕盛風雲。安危此日資元老、早應蒲車翼聖君。

聞變十二首錄六

朔雪災天盡帝臣、都城金粟亦因陳。不聞一矢曾遺敵、敢謂中朝尚有人。野樹春殘巢幕燕、鮮原日暮泣幽燐。獨憑溝壑酬君父、曾否當年悟徙薪。

十年謀國事招攜、清野頻經補牘題。土有分民城內外、生隨流水浪東西。魂搖乍覺離豺虎、手實俄驚錄犬雞。誰爲繪圖持入告、郊垆原亦是黔黎。

榆關春老草芊芊、列騎如雲抱戟眠。不向運河留一線、可誰飛輓佐三鞭。西涼士馬終懷晉、索部魚羊解擾燕。南北安危憂不細、早騰優詔到居延。

金陵六代帝王都、此日龍興氣象殊。最愛鄜南符建武、肯論江左有夷吾。開天常構留神識、率土弓旌識聖謨。隴土隗純今在否、早教黎獻樂樵蘇。

漠漠腥風動薊門、鼓鼙聲斷日黃昏。殷憂共憶宵衣久、遺澤猶聞血詔存。滿目河山留義烈、故宮黎庶逐啼魂。江流不盡敷天恥、薪膽憑將獻至尊。

二百年來世澤長、謳吟俄已徧炎荒。反裘未許哀鴻雁、飽宿何當畏犬羊。溪畔漁竿拚嘯傲、江城駟介自翱翔。朝廷可是師生責、倚劍酣歌笑爾狂。

### 崖門弔古

萬古煙波接渺冥、雙峰如闕控重溟。草藏宋血還餘碧、浪洗胡塵尚帶腥。魚腹有靈迎玉璽、龍髯無路樹冬青。中原極目今戎馬、憑弔先朝一涕零。

### 獄中步文丞相韻

生涯少壯但傳經、通籍纔周兩歲星。鄉國愁看成隕籜、室家寧計問飄萍。萬言舊疏憑誰乙、五木嚴刑拼備丁。泉路若逢文信國、不知雙眼可誰青。

### 獄中自述

去歲承恩桂海濶、何期國步倍多迍。室中自起金戈爨、天外俄驚鐵騎塵。入夢翠華頻想像、招攜烏合每逡巡。經年辛苦慚何補、應識皇明有死臣。

### 大廟峽

怪石攢峰橫巖孽、巨靈手擘顏如鐵。重關三疊瀦潭深、懸絲兩溜奔流折。北韶南廣此中分。千里遷延入楚閩。豺虎氣驕嗥夜月、猿猱愁絕叫寒雲。舟次看山山欲墮、更看錦石中流蹕。水涵如逢灑瀨堆、流深卻擬橫江鎖。湟川瀆水兩湯湯、掣電奔雷怒欲狂。挽路上江俄斷絕、長年捩柁較毫芒。蠻煙瘴雨仍中判、海壩州邵資屏翰。盧循暫過遽東浮、黃巢竄入俄西竄。峽外群巒黯不開、奧區奇道更行迴。憑誰建策能增戍、長得熙攘滿越臺。

### 戲贈華巡簡

既有明兵科、亦有清巡簡。一索繫二賢、同舟負刑版。兵科緣伊何、髮長兵略短。巡簡緣伊何、土豪相推挽。蹉跎陷困城、所恨見機晚。攜手走泉臺、誰爲奠漿飯。





獨隱堂詩箋 卷首



十一



獨漉堂集（詩箋）

陳恭尹

先生字元孝、晚號獨漉、鄉籍龍山。生於明崇禎四年、公元一六三一年、卒於清康熙三十九年、即公元一七零零年。先生乃陳邦彥長子、年甫十七即遭國變全家蒙難之日、先生幸及時隻身逃到增城未婚妻湛氏之家、匿藏複壁中數月、得免一死。其後曾多次南北奔走、謀復明室江山、惟終以大勢已去、直至明桂王出走緬甸被執、被殺於昆明之時、始息此雄心、遂將抑鬱之情緒、抒發於詩篇之上、由愛國志士、而成爲一代名詩人。所傳獨漉堂集是先生親自編定、獨漉二字、乃取古詩有：「獨漉獨漉、父仇未服。」之意。詩分初游集、增江前集、中游集、增江後集、江村集、小禺集、小禺後集、唱和集、共九百十四首、在清初是禁書、至乾隆晚年始得解禁。再至公元一九五一年歲辛卯十月得其同鄉陳荆鴻先生力爲注釋名之曰獨漉堂詩箋。先生之詩又與番禺屈翁山南海梁藥亭並稱爲嶺南三大家。

獨漉堂集初刻原序

余自志學以往、皆爲患難之日、東西南北、不能多挾書自隨、而意有所感、復不能已於言、故於文辭、取之胸臆者爲多、而稽古之力、不及於昔人矩度、蓋闕如也。每以自愧、不敢示人而亦妄自謂丈夫當有以自見、何至作此冷淡生活。今四十無聞老矣、念方將請教於大人長者、吾之善不善、當與天下共見之、何有區區詩文之末哉、因命兒曹彙爲一編、偶一省覽、輒掩卷太息、自傷失學而已。甲寅九日獨漉子陳恭尹書。

初游集三十三首錄六

春感

石羊城下越王宮、天盡東南浪拍空。萬頃可憐春飲馬、重關不見士彎弓。威儀有日過三輔、草木何年借八公。寒食古臺新雨後、斷笳零亂起悲風。

哭外舅湛公公卒以六月干戈阻絕冬末始聞

碩德堪千載、高名重一時。黃槐隨鳳詔、彩筆對彤墀。下座人皆仰、微言世所思。游輕駟馬貴、歸盡綵衣嬉。問訟中途反、評才滿月移。不安林下席、將飽路旁饑。當食推盤粟、妨民拔露葵。郭生難得友、鍾子信堪師。以德應能壽、論年不及衰。壞梁歌已矣、朝菌忽先之。罷市鄉人哭、憐芳楚老悲。酸風朝颯沓、寒雨夏淒其。弔客來飛鶴、閒窗怨子規。自嗟逢世難、飲恨向天涯。望海情何極、尋鄉夢每疑。煙塵銷未得、書札到何遲。昔者趨庭訓、因之拜羽儀。稍能酬客語、才解誦親詩。不以東床傲、殊深戶牖知。國憂期共奮、家難忽相隨。庶下依皋伯、舟中學范蠡。提攜無異父、期許欲過兒。離別奄踰歲、風流渺莫追。長歌淚如霰、何待峴山碑。

過金陵不泊

故都殘照在、一望尚崢嶸。山擁吳雲峻、天連楚水平。到秋禾黍意、爲客古今情。高寢長松外、遺臣怯近城。

虎丘題壁

虎跡蒼茫霸業沈、古時山色尚陰陰。半樓月影千家笛、萬里天涯一夜砧。南國干戈征士淚、西風刀翦美人心。市中亦有吹篴客、乞食吳門秋又深。

歸自吳越與家皖翁龐藝長賚予弟握手龍津醉後成詩

松溪殘雨溼征衣、小泊鄉橋叩竹扉。萬里共驚吾尚在、三年偏訝信何稀。棘林雪盡銅駝冷、苜蓿春生鐵馬肥。醉死君家都莫惜、天涯多有未能歸。

葉世穎蔡良若同登金紫峰作

空林採藥倦、寂寞憩禪扉。買得山川酒、遙從風雨歸。雲生層嶂合、春盡落花移。向晚平疇



上、閒閒一鶴飛。

增江前集十七首錄七

新塘早春懷蔡良若何不偕

春雲漠漠虎頭東、幾日移居杏再紅。三徑草生殘雨後、數家門掩落花中。鄉山久別吟兼夢、水驛多情浪與風。有約扁舟未能去、幽期空負釣魚翁。

匡門謁三忠祠

山木蕭蕭風又吹、兩厓波浪至今悲。一聲望帝啼荒殿、十載愁人拜古祠。海水有門分上下、江山無地限華夷。停舟我亦艱難日、畏向蒼苔讀舊碑。

夜發甘竹灘

灘頭潮落樹昏昏、夜半移舟出水村。一渚暗雲迷大雁、片帆春雨下江門。愁來每失芳菲節、老去多慚父母恩。明日岡州花下醉、此心持與故人言。

擬古

橘子始可食、往往辭其枝。孝子方欲養、父母長別離。墓上椎牛羊、不如生蒸梨、高爵耀閭里、無親持慰誰。魂夢中夜來、九原知不知。

又

寄生在高樹、樹枯枝不繁。託身共生死、所惜非同根。昔我三小弟、俊邁難具論。國難一時盡、反令愚者存。豈無友朋好、終念骨肉恩。不見蒲葦中、鴻雁雙飛翻。雙雁飛上天、孤雁無與言。

又

射虎射石頭、始知箭鋒利。居世逢亂離、始辨英雄士。我生良不辰、京洛風塵起。生死白刃

間、壯心未云已。

又

猛士不帶劍、威武豈得申。丈夫不報國、終爲愚賤人。中夜召僕夫、將適趙與秦。方建金石名、安念血肉身。抗手謝儔侶、明日西問津。

中游集五十四首錄五

度大庾嶺

向風長歎草蕭蕭、山壓重門石氣驕。千古霸圖俱寂寞、再來行跡尚魚樵。寄書黃木灣何處、走馬紅梅驛漸遙。欲掃蒼崖記名姓、少年時已薄題橋。

留別諸同人

霏微殘月曉風寒、生死交情話別難。入楚客無燕匕首、送行人有白衣冠。舟辭香浦鴻初到、馬踏梅關雲漸看。後會不須期故國、中原天地本來寬。

白門別諾諾和尚

南岳千峰一衲棲、小橋流水入招提。山端遠影湘江盡、竹外閒窗楚岫低。十日淹留春色暮、中宵談笑月華西。岐途不用悲游子、芳草天涯路未迷。

赤壁舟中歌

曹家老瞞狡而武、百萬戈矛下荆土。贅闖小醜夷群雄、當時意氣無江東。江東少年劍斫案、驅風走火烏林岸。北船煙燼西蜀都、吳王宮殿飛赤烏。誰爲此謀葛與周、兩郎年幾二十頭。雄圖已矣勿誰道、赤壁舟中人已老。

庚子元旦毛子霞招同何不偕登黃鶴樓

君子羈心積此晨、鶴樓斟酌歲華新。城頭江漢一千里、坐上羅浮兩個人。細草暗催行處綠、



落梅飛盡隔年春。誰堪天下無窮路、來伴微生易老身。

增江後集一百八十三首錄十八

感懷

高臺臨廣池、梧桐百餘尺。上有一尊酒、可以永今夕。明月生東隅、浩蕩無拘迫。君子多暇豫、小人聊燕息。人生有如影、終始爲形役。拔箭射虛空、箭盡弓亦折。步出城北門、纍纍山上石。下有忘憂人、千秋託松柏。

又

海濱何遙遙、遙遙三千里。一里一千家、家家生荆杞。空房乳狐兔、荒沼游蛇虺。居人去何之、散作他鄉鬼。新鬼無人葬、舊鬼無人祀。相逢盡一哭、萬事今如此。國家啓封疆、尺地千弧矢。人民古所貴、棄之若泥滓。大風斷松根、小風落松子。松根尚不惜、松子亦何有。

又

太息復太息、百年同木石。富貴比春華、一落誰相識。不如求令名、高譽流丹青。丹青雖可慕、人命如朝露。一身尚不存、令名亦何附。不如齊死生、無我亦無名。試恐朽落時、亦與木石并。百足旣憐夔、奔蛇復憐風。是非百年內、展轉何能窮。

又

覽鏡在中夜、莫辨影與形。人苦不自知、所賴友與朋。圭璧貴攻瑕、龍阿期發矚。如何末世士、懷利忘友生。青望疑似間、讒間忽然興。陳張交里門、白刃生侯嬴。富貴尚相負、貧賤寧相能。結交始以義、全交終以明。安得兼黃金、以鑄鮑子靈。

宿羅浮飛雲峰候日出

仙山終古少行蹤、絕頂良宵不易逢。暗積落花歸上界、倒懸明月照西峰。江潮應瀑聲千里、

海氣成霞色萬重。一線日輪天已曉、遠雞才報下方鐘。

贈別屈翁山

落日臨大河、游子有歎聲。與君結交初、十五侍親庭。中間一杯酒、各有萬里行。飄飄沅湘水、迢遞遼陽城。歸來何所得、白髮三四莖。雲中有哀鳥、遺我一尺縉。上言所相思、乘龍再遐征。嗚呼永決絕、況當別良朋。踟躕欲有言、淚下先承纓。丈夫射桑弧、豈日期一身。大恥且不雪、獨善有何稱。

崇禎皇帝御琴歌

甲申春、烈皇帝宴坐便殿、鼓翔鳳之琴、中曲而七絃俱絕、龍顏不怡良久、逾月而有煤山之變、其琴流落人間、濟南李家購藏之、屈翁山具述見聞、中座罷酒、各請爲歌、夫物猶如此、哀哉。

孤桐何生生嶧陽、天家巧斲含宮商。乾坤四序在胸臆、七寶交盤雙鳳凰。烈皇宵衣坐璇殿。欲奏南薰和赤縣。朱絲七軫軫七絃、一時迸絕君王前。君王三月騎龍去、神物潛行越河駟。羅浮道士搜遺弓、五拜親瞻翔鳳字。來歸泣語臨秋浦、白日晶晶旆飛雨。沉乃風高水波立、海隅咫尺非吾土。豹之斑下人間、鱷之橫出深阻。掩君淚、爲君吟、彼琴者木木有心、四海男兒何至今。

同何不偕梁器圃魏和公梁藥亭陶苦子宿靈洲山寺東王說作王大雁

靈洲秋色淨無煙、水匝山隅浪匝天。落日客尋江上寺、出林僧放月中船。漁依別港燈侵閣、鶴宿高巢影在泉。欲與故人同夢到、夜來吟詠不曾眠。

讀秦紀

謗聲易弭怨難除、秦法雖嚴亦甚疎。夜半橋邊呼孺子、人間猶有未燒書。



送何左王（衡）客遊

平生林下共幽期、至德如君是我師。一日未曾離奉養、十年不擬到城池。貧當亂世娛心少、老畏名山入眼遲。暫脫綵衣行萬里、春江楊柳綠絲絲。

歲暮有作

死前生後事無涯、只繫皇天不繫才。得酒直須千日醉、擁書空過十年來。身同海燕家長寄、目與河魚夜並開。深掩柴門對童稚、一冬飛盡故園梅。

木棉花歌

粵江二月三月來、千樹萬樹朱華開。有如堯時十日出滄海、又似魏宮萬炬環高臺。覆之如鈴仰如爵、赤瓣熊熊星有角。濃鬚大面好英雄、壯氣高冠何落落。後出棠榴枉有名、同時桃杏慚輕薄。祝融炎帝司南土、此花毋乃群芳主。巢鳥須生丹鳳雛、落英擬化珊瑚樹。歲歲年年五嶺間。北人無路望朱顏。願爲飛絮衣天下、不道邊風朔雪寒。

石湖觀梅花分得動字柬羅仲恭羅顯哉兼懷湖主人羅澹峰

溪西千樹當時種、數尺枝條柔可弄。不踏湖隄向一年、已覺繁花密無縫。經過昨日此匆匆、兩夕懷思不堪誦。栽花主人隔千里、花下扁舟與誰共。虬髯逸興迴不群、公子翩翩復殊衆。折柬相招到石牀、新醅不惜開銀甕。遠方英俊兼秦越、萬座雄談雜嘲諷。是時霜後積水清、湖西滉漾波光動。四山開朗有佳色、孤嶼蕭疎欲含凍。共誇密雪賦梁園、復訝行雲入荆夢。幽光漠漠去岸高、素色鱗鱗壓枝重。拂衣屢愛輕瓣飛、行杯更遣濃香送。逆風十里氣尚滿、沿流百步溪猶壅。高天可厭白日墜、廚人未報清尊空。老夫短棹欲早歸、上客斑駁亦停鞚。開牋意思已潦倒、下筆詞章乃狂縱。寄謝梅花勿笑人、由來險韻難爲用。

送何不偕之桂林

千里江西路、多奇是桂州。裂山行巨浪、依石上孤舟。君見他鄉葉、都歸故國流。應書得意句、相問海東頭。

春日登粵王臺

花發高臺磴道遙、粵王曾此拜中朝。誰云七郡初歸漢、古著南交已宅堯。江勢急流宗渤海、山光相望憶簫韶。炎州文物從來事、霸氣千年倍寂寥。

游俠詞

左刀如白虎、右劍象蒼龍。直走長城北、風雲滿路中。

又

相見一杯酒、天涯即弟兄。出門贈百萬、上馬不通名。

又

十年居委巷、上有白頭親。此別逢知己、微軀亦借人。

江村集九十七首錄十二

修禊後十日石濂禪師招同諸公雅集長壽禪林即事賦

真妄非二途、遇智各有適。同此聞見中、心目異喧寂。西郊亦人境、靜者得幽僻。交錯引翠條、蕭疏布林石。春事滿高窗、鳥聲在簷隙。悠然古招提、曠若新開闢。嘉招及令序、竟日隨飛錫。論詩陋休遠、折理兼元易。既喪我於吾、焉知主爲客。欲別聞清鐘、溪山暮雲碧。

獄中雜記

鈴柝鳴終夜、星河耿暮秋。但令圭未玷、休問杼曾投。東海仍秦帝、南冠號楚囚。此身翔不下、何處學輕鷗。

又



土室分東半、疏籬別作房。竈煙凝几硯、窗雨滴帷床。晝鼠游無憚、宵蟲網不妨。故人知更甚、消息隔重牆。

又

鬪扉今半月、佳節報重陽。粵俗人登墓、秋風稼在場。天遙惟見雁、地苦已飛霜。書札詢兒輩、溪花幾處黃。

又

南生期免戮、葛相戒求聞。一自違丹闕、惟知戀白雲。蟬無遮噪葉、豹有害身文。將老嬰縲綫、深慚父母墳。

又

己是傷心客、那堪太息聲。隔牆來斷續、入耳怨分明。世俗趨傾險、神州尚甲兵。何時瞻化日、青草獄門生。

又

初度尋常度、今茲倍愴神。傷哉居穢地、不敢禮先人。亂日生何樂、餘年死與鄰。只愁來世事、難定報恩身。

又

舉世悲先烈、虛名萃眇身。局天非一日、畫地又何人。不獻鄒陽作、終知石父伸。從來黃與綺、秦漢未稱臣。

又

春前殤兩穉、災禍不云孤。豈謂妻孥淚、居然泣老夫。往來詢動履、肥瘦寄衣襦。會有生還日、張儀舌在無。

又

已歇霏霏雨、初迴習習風。日車朝漸北、斗柄夜方東。大夢過前事、長愁到老翁。羈棲頻渡歲、只欠獄門中。按詩箋注載先生下獄之故是據先生自序稱戊午秋罹無妄之災下於理者二百餘日己未春事始解寥寥數語不置辯釋原作共二十六首

邑中同人招飲西山草堂即事

名園重得聚英豪、暑月杯盤敢告勞。匝水松陰鋪地潤、出牆月色帶山高。時光老去深知惜、筆硯愁來漸懶操。同是少年吟嘯地、新霜看上鬢邊毛。

仲冬十三日贛兒受室率成一律示之

燈紅月皎兩相宜、且放中懷入酒卮。萬種未完爲子事、百年過半作翁時。山寒漸入青春色、梅老偏高白雪枝。莫道傳家無素業、先公猶有一經遺。按箋注贛字端木娶南海吳文煒之次女先生之摯交也

小禹集一百七十首錄二十五

九日登鎮海樓

清尊須醉曲闌前、飛閣臨秋一浩然。五嶺北來峰在地、九州南盡水浮天。將開菊蕊黃如酒、欲到松風響似泉。白首重陽惟有笑、未堪懷古問山川。

壽岑金紀

二十始相識、西樵七十峰。峰峰挾春酒、坐聽山門鐘。海日竟不上、白頭還幾逢。相看兩不變、心與雙芙蓉。

梁殿一殿章招飲雨花洞即事

五峰處處有名區、最是君家似畫圖。已割山光來屋裏、不妨樓外即城隅。春垂峭壁千花細、石透盤根老樹孤。兩世過從今幾度、快聽春鳥勸提壺。

春日同吳又札梁臺符郭公鷺游東郊倪公隄觀徐邑侯新修石橋松路



杏花風裏酒旗翻、郭外新隄帶遠村。雙塔雲生偏蔭路、九橋潮長各爭門。童年棒杖還誰在、老大歸心未易言。待得小松高百尺、與君春雨更攜尊。

別朱竹垞三十六年矣癸酉二月復會於廣州三日別去送之以詩

三日江邊駐客船、菩提壇下又離筵、如何三十六年別、一日分爲十二年。

題遲靈山屏萬行樂

德行之方如面、詩卷之高等身、三仕三遷仙吏、一琴一鶴其人。

惠州代汎亭雨後望西湖

高亭下視極人寰、積水遙連埤垵間、一線綠分湖上路、幾重青出郡西山。坐臨勝地如曾到、名在千秋自不刪。不是使君閒著眼、後人何處得躋攀。

修先墓作

白頭良已矣、子職竟茫然。負此一抔土、於今四十年。卹忠餘往典、紀事有新編。寂寞松楸下、豐碑誰爲鐫。

又

文淵猶蒿葬、正則且沈身。古者無修墓、非言患難人。報惟存此日、舉必念千春。黽勉從微力、傷哉由也貧。

又

不辰吾最甚、十二喪慈闈。對食啼蔥葉、當秋泣線衣。國憂纔隔歲、泉路幸先歸。賜葬仍同穴、絲綸灼有輝。

又

峰西頻倚杖、一上一徘徊。筋力今如此、餘生能幾來。彼蒼誠有感、積雨喜重開。十日松間

坐、濤聲總是哀。

又

固安惟至願、尺寸自經營。墓是無窮事、人兼不朽名。發祥如有本、憑弔所從生。雖乏青囊術、滕公自得城。

又

萬山青不極、曠絕此登臨。大化自通塞、吾人爲古今。風搖千畝綠、雲散一溪陰。轉盼皆陳迹、彌傷志士心。

乙亥生日歸錦巖先祠許伯玉喬梓載酒相餉同潘子登梁巨川盧俊斯集飲即事

老矣猶堪斗百篇、生初長記在親前。黃花又值三三月、白首今逾八八年。古岫石林原壁立、新祠風木尚蕭然。勞君載酒能相餉、且爲停杯一問天。

讀梁高士寒塘辭世詩次韻哭之

絕無沾滯絕根塵、膚髮完歸與兩親。蝴蝶夢中醒睡客、白蓮花裏去來身。天邊星已占方朔、谷口名猶說子真。不恨夜臺多好友、西山薇蕨漸無人。

又

寂寞空齋閉竹門、寒塘西畔暗雲屯。心從灰後仍餘熱、水到窮時自得源。作傳敢辭朋友責。遺經深幸子孫存。朱明丹火西樵月、照爾千秋處士魂。

贈山農

旅舍濠西曲巷偏、扁舟來往愛君賢。親嘗百草歸游棹、自寫青山不賣錢。

爲大嚴禪人母比丘尼六十壽

四十年前識若翁、聞歌桃葉比花紅。而今老作城東母、親見如來十指中。



戊寅元旦家園漫成

雲物春城佳有餘、小臺搔首立踟躕。百年駒過三分二、一歲人閒正月初。生態可知霜後樹、舊交惟有蠹殘書。東風掩戶教兒輩、霄漢新翎看鶴梳。

錦巖先祠有梅一樹春將半猶盛花在粵中爲希有與巨川俊斯詠之

桃時杏日各爭開、何意林中尚見梅。密葉已兼青子出、數花如待主人來。枝橫自昔難爲詠、頭白而今不用催。應惜和羹才未盡、先公祠下與徘徊。

外姑湛節母馮太君八十大壽時旌表初至

先公高義人間少、節孝天生閩內才。再世漂搖爲砥柱、百蠻龔俗有驚雷。西臺使者飛霜筆、南國詞流祝壽杯。五十年前皋廡下、白頭無復孟光來。

海珠寺謁李忠簡祠追次先府君韻

誰移古寺到波心、往哲遺蹤竟至今。珠號摩尼從佛得、江浮明月照東吟。一邱偃蓋情何遠、半壁河山澤尚深。四百餘年存俎豆、清風猶自滿雙林。

又

百年能立即千春、不朽天南代有人。痛哭書生曾伏闕、出師丞相亦綸巾。遺篇在卷難爲和、往事傷心莫可陳。文獻比來凋落盡、餘光今幸借西鄰。

題鈕高明玉樵行樂圖

家於笠澤接春溪、何地堪樵亦偶題。一令山城最深處、西樵七十二峰西。

壽張方伯樞侯

金貂七葉向來傳、身列崇班尚少年。白簡有風存北闕、紫薇新澤滿南天。樹人歲育三千士、賑米朝糜百萬錢。猶說報恩懷未盡、欲將心力更籌邊。

小禺山後集四十八首錄三

先始祖祠宇改建初成承宗戚諸公賜祭卒賦一律志謝

事遠難銘魏氏鐘、手栽猶見大夫松。未離故寢成新廟、且喜開門對一峰。顧我垣墉書潤略、勞君升降禮雍容。先朝遺俗吾鄉在、厚意深慚報莫從。

勵兒北上口占示之

吾衰良乙甚、汝往慎前途。一騎過河岳、遍舟下楚吳。眼中新白雪、夢裏古皇都。最是英賢會、同聲自不孤。

又

文章先世業、用舍百年身。送爾無他語、思爲不朽人。舊山叢桂老、去路杏花春。倘謝經生籍、韋編正好陳。

唱和集三百一十二首錄十二

五仙觀

高閣聞午鐘、石門旻已啓。摳衣躡層磴、遙與仙人禮。俯沼濯幽泉、開軒酌瓊醴。輕風自東來、管絃發朱邸。未覺所歷高、城郭忽在底。群公濟時碩、銜命來丹陛。嘉會匪前期、東西各旌棨。奇蹤辨羊石、妙墨逢蘇米。不謂荒煙餘、名流今濟濟。文章繫氣運、頽波藉中砥。酒闌問新題、賦詩效何體。

海珠石

汎廣倦遭迴、陵高苦奔峭。江中得孤嶼、足以雄登眺。西睇蒼梧雲、東望羅浮嶠。遙天落峰影、遠水明殘照。五羊古都會、往事堪憑弔。中原時逐鹿、一隅常虎嘯。丸泥橫浦關、左蠡炎州徼。趙劉及何洗、粵曲原同調。各自一時豪、寧貽千載誚。茲邱隔城市、興亡非所召。



如何游行地、繁盛乖年少。遺碑臥苔蘚、壁壘環頽廟。東風吹古臺、歸潮鳴石竅。觴詠對同人、臨流成一笑。驪頷君所探、魚竿吾欲釣。

玉屏風看梅是七星巖絕頂

玉屏峰峭客來稀、玉樹瓏瓏透夕暉。無土亦應滋石乳、有花惟是點仙衣。鳥迷雪色棲難定、雪戀寒香駐不飛。莫倚羅浮曾入夢、和羹人自夢巖扉。

冬夜高峽同屈翁山聯句二十韻

食霧嘉魚出（屈）含風顧兔搖。衝寒從鬱水（陳）首路指高要。入峽乘寒月（屈）依沙候早潮。榜人愁夢短（陳）漁子恨歌遙。石束牂牁勢（屈）山分大庾條。雙厓高易削（陳）半壁漲難消。上下多猿影（屈）潺湲似鳳簫。峰留天一角（陳）霞作海孤標。化石憐貞女（屈）看棋憶古樵。羚羊潛水裔（陳）鴟鵂悶山椒。白玉參差筍（屈）丹砂尺寸苗。霜苞開橘柚（陳）土布卷芭蕉。金渡龍鬚席（屈）瓊州孔雀翹。舳艫爭入貢（陳）洲島已全招。虎豹關門壯（屈）鼉鼉窟宅驕。飛樓凌縹緲（陳）湧塔出雲霄。建節雄樞府（屈）迴巖儼斗杓。黃門喧鼓吹（陳）赤社盛弓弨。鱸鯉筵方啓（屈）羹梅味正調。野人趨讌喜（陳）竟席倚蘭橈（屈）

哭龐甥東侶孝廉

見汝成童外祖前、今看行狀倍潸然。傳書只有中郎女、作賦纔過賈誼年。貂敝長安頻是客、鳧飛葉縣未成仙。白頭老母傷何極、奉養猶資汝弟賢。

次答聞一老僧年九十餘善琴能畫

行腳輕千里、高年近百春。雖云方外士、猶是老成人。水筆隨山笠、孤琴伴獨身。曹溪親到後、何者是埃塵。

文昌閣詩寄張西寧婁涿

三年相望眼猶青、千里音書問驛亭。已盡南人歸化雨、更開新閣禮文星。地無高下春皆種、家有絃歌夜不扃。想見使君閒更甚、清溪時倚畫闌聽。

九月晦日同連雙河湛天沐慧容上人二兒士皆自增城將登羅浮中路宿資福寺

羅浮每約不成行、且喜肩輿早出城。塵路未知還遠近、仙山遙望已分明。田收晚稻餘秋色、寺入溪橋隔竹聲。同詠新詩各惆悵、故人卮酒未同傾。

泛舟甘溪送薛炎州朱遠公李祈年歸龍江

春江何處不萋萋、掩映群峰到郭西。岸柳飛花時渡水、山家開戶半臨溪。已知異境人間少、難得同心酒座齊。莫指鄉園便歸去、舟前聽取鷓鴣啼。

閏月晦日韶州陳毅菴使君招同惠州王子千使君梁藥亭太史廖南暉屈翁山諸公集廣州行署

聞將爲先正張文獻余襄公重梓文集喜而有賦

不將絲竹亂清真、雅會天南盛主賓。五馬風流雙郡守、二毛樽散數詩人。杯名避暑逢秋閏、地接歌棠是德鄰。浮岳曹溪俱有約、杖頭從此託閒身。

人日次梁藥亭韻兼柬川南長壽

衰顏與懶歲俱增、心在冰壺更著冰。七日爲人雖復爾、五倫於我獨存朋。川南使者新貽酒、海外歸僧昨寄藤。舊好無多皆白首、草堂期續夜吟燈。

次韻答徐紫凝

文章大道以爲公、今昔何能強使同。只寫性情流紙上、莫將唐宋滯胸中。維揚不入刪詩地、百越咸歸霸國風。終古常新惟日月、金烏先自海東紅。



南墅集

陳克侯

先生字士鵠、鄉籍古朗。明嘉靖三十七年戊午、公元一五五八年舉人。官歷閩縣教諭、訓迪周詳、擢永福令、處雲貴州事、常計平邊患、後因事免歸、猶力學不懈、居二十年乃卒於家、遺著詩文集外、有時政策議傳世。列傳見咸豐縣志、詩章見鄒崖逋者鈔讀之嶺南詩存。

貴州城

亦是一都會、人煙不萬家。聲音蠻語雜、風俗鬼祠華。兵餉資荆蜀、夷酋貢馬茶。群才自經略、過客莫深嗟。

渡楚江

丹楓日夜落、不盡楚江流。客路驚玄序、塵機愧白鷗。賈生淹弔屈、王粲老依劉。今古同飄梗、無嗟不繫舟。

下獄柬宋師朱

跼蹐窮途日、寧虞震電臨。孤臣萬死淚、明主再生心。疊嶂嵐煙苦、重關虎豹深。百憂予共汝、澤畔未堪吟。

留別李中丞孟成

共抱枯魚泣、如君更可憐。倚門勞鶴髮、貫斗急龍淵。懷糈悵何適、加餐慎自全。古經天未喪、誰向夏侯傳。時李同被劾下獄

又

千古征南將、誰如馬伏波。斬鯨清浪泊、刑馬對山河。裹革心何壯、懷珠謗自多。倚天銅柱在、西望涕滂沱。

別宋郡丞師朱南歸

豈期明盛世、猶對泣南冠。一日青蠅起、千秋白璧寒。風霜臣節苦、天地主恩寬。歸去過印坂、無嗟行路難。

又

拙宦嗤余輩、眞宜絀網羅。人情輕玉毀、時事重金多。終計逃蓬藿、初衣遂芰荷。夢回滇海上、猶自怯風波。

除夜入滇關

何事窮年轍未停、霜花飛盡雪猶零。三更鵲繞臨關月、萬里人驚入部星。竹杖更誰通遠道、梅花無使寄長亭。驅車西去蘭津路、到處王孫草又青。

敬齋吟草

陳珙

公字德章、號敬齋。鄉籍龍山北華、嘗從瓊山邱濬遊、綜博群書、弱冠有聲庠序、明成化己丑、公元一四六九年進士、選庶吉士纂修、官歷監察御史、晚年設教都閩、一時鄉之俊秀與北方學者多其成就、尤能清貧自守、垂範子孫。事略見咸豐縣志、詩章見公元一九三五年歲乙亥溫肅輯錄之龍山詩錄卷上。

浮屠遠眺

腳踏浮屠絕頂顛、恍如人在九重邊。望窮珠海數杯水、看盡羅浮半點煙。五色祥雲時掛角、四方星斗繞巡簷。月中丹桂隨心折、伸手依稀欲到天。

漫興

家史寥寥幾十春、擬將筆削屬何人。纂修不爲光前烈、激勸何由示後昆。一字敢辭誅罪重、百年甘任是非身。年來秘閣深思省、只有貞心對鬼神。



穎川吟草

陳光穎

先生字少敏、鄉籍桂林。祖父韶、字宗舜、明宏治舉人、官歷福州府推官、享大年、登耆壽錄。光穎承家學、舉萬曆己卯鄉試、官通判。事略見咸豐縣志、詩章見溫汝能纂輯之粵東詩海卷三十八。

南康道中答劉石梁

菊徑樗園亦主恩、焚魚躍馬出郊門。如弦豈用擬三箭、折羽何當到九閭。馬鬣未封疑宿草、雁行中斷愴荒原。維舟向暝逢漁父、指點春流有落磬。

蘭軒詩草

陳雲仙

女史鄉籍待考、明代太學生陳士賢之女、著有蘭軒詩草。見溫汝能纂輯之粵東詩海之卷九十六。

寄余玉馨表妹

憶別分攜在柳陰、奇山上望象山岑。手牽玉藕絲難斷、口嚼青茶苦自禁。古鏡不磨難見面、銀缸未點尚留心。寥寥孤館同誰語、芭雨桐風幾夜深。

寄外

去時爾語尚云云、去後音書總不聞。殘黛懶描三月柳、亂鬟愁理一梭雲。可堪林際鳩呼婦。頗奈天邊雁叫群。難得相逢容易別、機絲何用織迴文。

江行

止爲偷閒狎鷺鷗、扣舷歌唱出沙洲。又從別浦尋幽興、觀採荷花女伴遊。

美人看劍

試取粧前玉匣開、光鋌秋水迫人來。風塵可與兒夫佩、謾道兒夫得意回。

定性澄心詩草

何彥

公字善充、鄉籍馬寧。明正德己卯舉人、嘉靖乙未、公元一五三五年進士、官歷南京戶科給事中、甘肅行太僕寺卿、恂恂於人無忤、晚年告歸、築樓曰定性、曰澄心、靜坐其間、講學賦詩、當道重之、年九十卒、祀鄉賢祠。事略見咸豐縣志、詩章見粵東詩海卷二十三

湘陰道中

迢迢南望又長沙、竟日驅車到海涯。雲溟溪橋迷去馬。雪寒枯木點啼鴉。村春市店遊人道、煙火疎籬野老家。幾度觀風獨惆悵、咨諏今已愧皇華。

九日偕兵憲周獅峰同年譙湫賓山遊

淡淡秋容點葛衣、追遊不負此佳期。雲移石洞蘿陰合、風靜寒江樹影微。擲甲山留終古恨、磨旗人憶往時悲。興亡自是尋常事、漫向樽前索舊題。

前題之二

晚憩龍山此日行、荒臺寂寂傍孤城。人歸古岸寒煙斷、鳥弄深溪夕照明。幾度登臨還勝會、一時賓佐有餘情。風流故態今何在、空記當年落帽名。

登嶽宿上封寺

攀緣直上最高峰、五老山尊讓祝融。南去香爐插天柱、東迴紫蓋擁芙蓉。入雲雞犬通仙界、出洞蒼虬隱怪松。風送梵音人語靜、爐煙裊裊傍疏鐘。

三城秋望

三城引望思依依、秋入衡陽雁始歸。共酌花邊風物麗、忽聞江上鼓鼙希。蒼茫樹色連煙火、澹蕩山光接翠微。但願海波長自定、白頭吟弄老漁磯。



朗吟軒稿

何其睿

先生名體性、自號介邱山人、鄉籍待考、明代布衣。著有朗吟軒稿、事略與詩見粵東詩海  
旅館寄諸同社

忽驚搖落後、黃葉墮庭深。道路秋風鬢、江湖夜雨心。有書傳海內。無棹訪山陰。久客兼多  
病、相思瘦不禁。

梅花詩稿

何維翰

先生字羽平、鄉籍待考、明萬曆己卯公元一五七九年舉人。事略與詩見粵東詩海卷三十八  
梅花詩

舊是蓬壺玉女班、霓裳乘月下人間、夢迴雒涘今非昨、遙望三神海上山。  
靜夜風林玉有聲、薄雲將雨過江城、不堪五月懷人處、黃鶴樓中無限情。

羅峰詩存

何衡

先生字左王、晚號羅峰、鄉籍羊額、乃不偕長兄。生於明天啓二年壬戌、公元一六二二年  
、享年六十有五。衡少從宿學何獻將先生游、好學能文章、以生逢天下多事之際、遂絕志  
進取、隱居教授、閒暇則遊覽山川、常登羅浮之勝、有古逸民之風。事略見陳荆鴻著之藝  
文叢稿、詩章見鄒崖逋者鈔讀之嶺南詩存。

寄天台隱者

近瀑山田美、帶經猶可耕。黃牛驅兩角、白石煮三更。鳥就床前宿、人從樹杪行。羨君棲隱  
地、吾亦薄時名。

惠陽竹枝詞

惠陽城南浪似雷、惠陽城東江水來、囑郎莫學雙江水、一合千年去不回。

明何絳撰

不去廬集

何氏至樂樓叢書之五



不去廬集

何不偕

先生名絳、號孟門、鄉籍羊額。生於明天啓七年、公元一六二七年、卒於清康熙五十一年、公元一七一二年、葬於容奇小浮沙岡雨花寺之後、歷久而失。八十年代、編者回里、尚見有何不偕先生墓道殘碑一石、棄置於雨花寺道旁。先生少時從學於族祖獻將公名儒門下、飽誦經傳、壯歲值國變、曾一度與同邑陳恭尹逃亡島嶼、參與抗清復明活動、後以大勢已去、乃輾轉回里、以夷齊自許、遂與其兄衡、同邑陳恭尹、梁槿、番禺陶璜、常出沒於羅浮西樵二山之間、相與飲酒賦詩、號稱北田五子、以此終老。遺著有皇明紀略、何氏家乘及不去廬存稿、惟多年散佚、不去廬集至公元一九七三年、南海何耀光先生得番禺汪兆鏞手鈔本及先生之下傳七代姪孫蒙夫之補遺、影印傳世、列爲何氏至樂樓叢書之五。集內除詩章外、載有議、序、傳、贊、記、詩餘、洋洋大觀。事略見順德聯誼總會三十周年紀念特刊陳荆鴻先生主編之先賢文物版。

出都謠八章

鞭馬射狐、狐入地呼、天高不聞、老狐別雛。

走兔不死、得見天子、飛鳥一群、壯士如雲。

熟黍熟黍、緣無雀鼠、雀鼠之無、實賴天子。

離京十里、車聲未已、一耳十環、官人之婢。

斬竹斷木、不避民屋、青紋刺面、云是官僕。

易水漫漫、冰猶未泮、拙矣荆卿、一去不返。

下上高原、昭君之村、九原可作、庶釋涕痕。

地動殃民、除稅七分、身死爲礫、無由報君。

出宿江門寄別任肇楚井序

城邊棹發、天際人歸、騎羊者入楊柳之堤、垂鷁者泛漪漣之水、情懷繾綣主客琅璫、轉盼而緣護云遙、舉目則江門已近、月中烏鵲、遠樹難棲、水上蒼龍、橫江莫渡、爰成短句、用寫寸心。

船頭明月光、客子心煩傷、月上潮初起、篙師刺船忙。

試劍石

誰試千金劍、猶存石上痕、仇人滿天下、遺贈敢忘恩。

越溪謠

越溪諸女兒、蛾眉須自重、但得夫婿憐、何必君王寵。

蕩子行未歸

蕩子遊遠方、佳人倚繡戶、茶采語椒聊、汝辛我亦苦。

寒衣詞

寒衣我已定、非是妾疎慵、有線無鍼引、教妾何由縫。

雜詩

我家有寶劍、鑄成匪一朝、珍藏雖未用、奇氣常干霄。

古歌

自郎千里去、終日愁煞我、夜燃紅臘燭、淚血暗中墮。

聞郎客在楚、楚國有巫山、應是神女故、教郎不得還。

怯坐月明中、非爲月光冷、不堪月照人、低頭獨顧影。

投藕綠池下、花開值晚煙、捲簾當戶坐、望蓮不見蓮。

得姓初祖

扁舟來往繡溪津、一字荒唐已避秦、翻覺桃源人更拙、舉家何用絕交親。

入粵始祖

仙種自來遲結子、開基嶺表澤何深、須知億萬籌難盡、總在當年一片心。

西湖後曲十首錄四

仲夏之月避暑湖中、既作西湖曲數首、八月十四夜承嚴子錫臣攜琴載酒、邀余爲永夕之遊、上下六橋、撫今思昔、不覺低徊久之、復作後西湖曲、其於風雅、河漢何如、

西湖且笑我爲馮婦矣。

木鵝城下是菱溪、溪水東流不貯泥、好趁月明齊打槳、蘇公堤過又甘堤。  
棲禪寺口月明時、欲繫扁舟限柳絲、豈是薄情離別易、虧人折盡路頭枝。  
菱荷過盡出菴葭、下郭村前月色斜、山近羅浮無惡虎、如何閭巷少人家。  
忘機喜接集鷗涯、秋月秋風事事佳、世上機心忘已盡、不知何事復傷懷。

家二兄入羅浮余之循州承陳獨漉珠江送別卻寄

三湘曾共客江潯、散髮狂歌屈子心、自喜年來無箇事、每於清夜一思尋。  
同君食罷武昌魚、建業江頭又寄居、君自文章滿天下、等閒須著紀遊詩。  
細雨春風習習生、羅浮山下正開耕、心能絕俗何妨隱、莫泥夷齊要弟兄。  
天平山訪元會上人不值

老僧遯跡石樓閒、欲扣禪扉識道顏、秋草路邊人跡斷、已隨流水下青山。

太湖

縹緲峰頭霜葉鮮、秋風吹上泛湖船、坐看日月相消長、似是人間別有天。



郊居

小樓對山寺、石路隔垂蘿。野鳥過城少、閒情出郭多。家貧慎出處、學淺歎蹉跎。燭火光猶近、誰爲白石歌。

輕衫聊出戶、最喜薄涼天、葉下清霜裏、禽歸薄照前。漁舟晴入浦、農父晚收田。帝力慚難報、秋來復有年。

贈陳元孝新翁

喜君年老矣、白髮漸成梳。完卵覆巢下、生兒有室初。何能畢志願、聊得賦閒居。舊業龍山口、春來好荷鋤。

集南園五先生祠

明月正當戶、良朋共此時。昔人不可作、大雅鮮能追。忽覩師中律、難觀灞上兒。因君發長歎、流俗竟如斯。

聽澤遠弟彈琴

月色散庭陰、當風彈玉琴。清霜來五月、餘響出層岑。古意幸猶在、今人豈所任。雁行雖有我、敢自託知音。

陳村夜泊

吾愛川原好、秋風夜泊船。水邊禽箇箇、沙際月娟娟。濁酒昔誰醉、今宵長不眠。疏簾一盼望、獨有水連天。

登頂湖山

曉日猶未上、筍輿行漸光。山從百丈領、路繞九迴腸。出谷鳥爭道、入溪雲觸裳。纔聞鐘磬動、吾已覺花香。

匡門謁三忠祠

雙峰如闕水迢迢、恍惚洪濤怒未銷。相國有祠遺異代、書生無淚灑前朝。空聞謝豹啼荒殿、無復黃龍起暮潮。禮罷苔階長太息、滿匡風雨正瀟瀟。

華山訪徐昭法

木蘭舟楫繫垂楊、千里溪橋到草堂。松子落山村路靜、稻花流水野田香。身因時異思深隱、髮爲愁多帶淺霜。歸路向城回首數、柴門客去掩斜陽。

金山

萬里寒波一點青、碧闌朱檻晝燒燈。入江塔影隨流動、倚石樓臺好晚登。魚聽寺鐘知出食、浪迴煙艇渡歸僧。遊人莫向西南望、遠跡蒼茫是秣陵。

黃鶴樓

霜雪東南靜不塵、楚天寥落在清晨。兩城日下洞庭水、孤渡時歸漢口人。異境豈因黃鶴得、旅遊何意白髭新。連年無事江潭上、芳草萋萋今又春。

九日甘泉道中

連天衰草漸黃昏、匹馬南來獨愴神。九日有霜霑木葉、中年無計謝風塵。金臺暫到非爲客、易水長歌不入秦。遙憶弟兄當此會、登高何處望遊人。

都門病中除夕有感

疎鐘急雪暗相和、漏盡其如不寐何。老至漸知貧境樂、病來方惜壯年過。空齋入夜燈光滅、寒夢還家歲晏多。寂寞床頭惟藥草、半冬憔悴帝城阿。

壽解虎上人

白髮如霜心似冰、終年行行把青藤。身將血汗興重殿、字賣金錢餉衆僧。五夜月圓添夏臘、

三堂經罷掩秋燈、輕帆我亦時相訪、坐到無言言不勝。

### 送攸躋弟之金陵

河干送汝雪花新、一雁飛飛誰與鄰。縱飲只因今日別、加餐應爲異鄉身。出關快事惟騎馬、入世平情易近人。客路若逢相識問、大兄衰老在江濱。

### 石人弟十月十五生日詩以贈之

一枝籬菊照霜明、風有微香酒後清。兔影滿時羞似汝、雁行久已愧稱兄。須知壯歲應多惜、且喜良材在晚成。無限五陵車馬客、丈夫原自貴修名。

### 猶子中木同余旅食吳門以事先歸作詩示之

五千里外初爲客、一棹還鄉秋又深。諸父已傷歧路別、雙親應慰倚閨心。登臨戒慎稱賢子、言語溫恭是德音。歸去家園長物在、梅花依舊滿疎林。

### 姑蘇送振夫姪還里

經年爲客共依依、雪滿河橋送汝歸。叔姪暫分江左路、夢魂先向嶺南飛。嚴寒且逐雲中雁、慈母欣看身上衣。我亦扁舟過震澤、巴山來日訪靈威。

### 四出梅關

堪笑勞勞數尺軀、半生空自有鬚眉。長吟草澤多新恨、四出梅關尚故吾。西去楚雲連七澤、東流章水下三吳。山川滿目皆惆悵、天下何人是丈夫。

### 丙寅春三月葉五招飲後山壽燕亭

城中大小山有六、無如此山快人目。蒼松百尺夾廣路、嫋嫋青蘿掛高木。路窮忽見有人家、依然雞犬與桑麻。此間男女并耕作、群羊曝日眠野花。石門中斷對西湖、湖光山色時時殊。六橋掩映垂楊裏、朝雲暮草啼鷓鴣。主人亭上開瑤席、重費金錢宴賓客。四時之味置兩頭、



笑倚胡床飛玉液。酒酣興發洞簫起、坐客新聲清入耳。林木忽動雲不流、藍采秦青何足比。須臾賭酒齊鸞弓、羽箭交加射春風。老夫雖乏猿臂技、觀之亦覺壯心雄。吁嗟此城十載前、作客向人曾談天。心醉名山未暇上、往來瞻望空流連。今日登山成白頭、世間萬事一墟邱。再酌馬腦盤光大白浮。誰爲爲奴誰王侯。會須一醉忘千憂。諸君切莫倚少壯、年光似電不可留。年光似電不可留。

十四夜西湖歌

西湖之水清如碧、左山右城兩相隔。西風昨夜吹湖山、千樹萬樹葉皆赤。披雲島邊館者誰、君平孫子讀周易。羅浮桂酒滿百船、木蘭舟裏開賓席。綺食雕盤永夜遊、薄才亦得叨爲客。長空皎爾淨如洗、月色似爲西湖白。水晶魚子芙蓉杯、丹蝦爲羹調鹽梅。勸君飲酒莫辭醉、人生良會能幾回。座客詞流三峽倒、清歌入破秋雲開。四山松柏風謾謾、明月正高流星催。蘇隄如帶五千尺、洗盞掃石坐青苔。況有楊公太古音、興酣拂席斂素襟。申言一座且莫喧、蜀錦抱出四尺琴。揮絃一掃千山寂、魚龍出水鳥歸林。移絃促節再一彈、月魄欲墮湖水寒。自言少小得妙悟、五音六律生指端。成連刺船去東海、伯牙弟子何足觀。是時月朗風更清、舍琴直上豐山巒。滿途參錯木棉樹、蕭寺尋僧僧已去。多謝寒溪萬丈泉、殷勤送客下山路。掛帆趁月返披雲、玉露墜下何紛紛。樽中有酒須盡傾、朱顏莫惜連宵醺。君不見杭州西湖種桃柳、桃柳一株一斛酒。連珠合抱豈辭勞、大官小官栽恐後。太平天子福難量、一朝紅綠成千行。聖恩浩蕩及名勝、一草一木皆不忘。吁嗟、何人何代非人臣、十常八九意不如。金蓮賜燭今安在、未若屋頭明月無年無。

西湖曲五首錄一

小小湖船十尺長、大黃塘過小黃塘、漁翁日午停雙槳、貪臥南風繫綠楊。